

PABLO REMBICUACHIA ROMA PENDAR UPE ROMANOS

Pablo mahenduhasa Roma pendar Jesús reroyasar upe

¹ Che Pablo, Jesucristo rembiguai, aicuachía co che ñehhe pëu. Tūpa che poravo apóstol che reco āgua ñehesa poropĩsirosa resendar mombehu āgua.

² Tūpa niha yipĩsuive omombehu uca co ñehesa ava oñehhe mombehusar upe icuachiapri maranehi pipe aracahe. ³ Ahe ñehesa Tūpa Rahir Jesucristo resendar. Ahe ava güecosa pipe ité oyesu ou mborerecuar guasu David suindar sui; ⁴ ocuerayevise oespíritu maranehi pipe, ahesse opĩratasa pipe omboyecua tupri ité Tūpa Rahir güecosa. Ahe niha yande Yar Jesucristo.

⁵ Ahe ichui Tūpa ombou cheu oporopĩtiviisa apóstol che reco āgua, che cuai avei ava ndahei vahe judío upe Guahir recocuer mombehu āgua opacatu ivi rupi sese yeroya uca āgua ‘ipipe sui toviroya che Rahir yuvireco’ oya. ⁶⁻⁷ Pe Roma pendar peico vahe, pe avei senoipri ipãhuve peico Jesucristo rese peico vaherã. Pe niha Tūpa rembiaisu peico. Oipota avei pe reco catupri āgua oyeupe nara. Peipisi catu porovasasa, teco tupriisa yande Ru Tūpa suindar, yande Yar Jesucristo suindar avei.

Pablo oso pota Jesús reroyasar repia Roma ve

⁸ Che yipindar yande Yar Jesucristo rer pipe, “Aviye ndeu” ahe Tũpa upe pe rese. Esepia, opacatu ivi rupi icuapri sese pe yeroyasa. ⁹ Iyavei Tũpa oicua pe rese ari rupi che yeroquisa. Chupe ité niha mbahe ayapo opacatu che p̄iha pipe, amombehu Tahir resendar ñehesa aviye vahe vichico. ¹⁰ Aporanduño ité semimbotar rupi pe p̄iri che so ãgua rese chupe yepi. ¹¹ Esepia, che aso pota ité Espiritu suindar mbahecuasa mondo p̄eu pe p̄itivii ãgua ‘toyemoviracua tupri catu Cristo rese yuvireco’ che yapave. ¹² Che aipota ité yande ñepeipei yañepitivii catu ãgua Cristo rese yande yeroyasa yareco vahe pipe.

¹³ Che rivireta, che aipota peicua setá rupi che so pota t̄eisa pe p̄iri yepi. Cũritei rumo ndaica-tuiño vite ité. Che rumo aipota, “Toime que che poraviquisa sui Cristo rese oyemoviracua catu vahe yuvireco ipãhuve” ahe p̄eu, inungar opacatu ambuae ivi rupi ãgüe ahe ava ndahei vahe judío upe vichico. ¹⁴ Che cuaita ité niha opacatu ava upe che ñehes ãgua, tecua pipendar yuvirecoi vahe upe iyavei ndayaracua vitei vahe upe, imbahecua vahe upe, nimbahecuai vahe upe avei no. ¹⁵ Sese pe Roma ve peico vahe upe avei ayemonguerẽhi voi eté co ñehesa p̄isirosa resendar mombehu ãgua.

Ñehesa p̄isirosa resendar p̄iratasa

¹⁶ Che nachĩ eté co ñehesa p̄isirosa resendar aviye vahe sui. Esepia, ahe Tũpa p̄iratasa opacatu viroyasar p̄isiro ãgua, judío rane yipindar, ipare opacatu ambuae ava-ava t̄ei avei. ¹⁷ Supi eté co ñehesa omboyecua Tũpa ava reco mbocatupriisa. Oyese yande yeroyasa pipeño ité ãgüe ehi yandeu.

Esepia, icuachiapri aracahendar aipo ehi: “Acoi ava seco catupri vahe Tūpa rese oyeroyasa pipe sui oicoveño itera apirēhi” ehi.

Opacatu ava rembiavi resendar

¹⁸ Supi eté niha yande Aposar oñemoirosa ipĩrata vahe ombou itera iva sui opacatu ava viroyasarēhi upe, ndaseco pōrai vahe upe avei, mbahe güembiapo ai sui ndoicua uca potai vahe co ñehesa supi eté vahe ambuae ava upe yuvireco.

¹⁹ Ahe oicua tupri tēi mbahe Tūpa suindar yuvireco. Esepia, Tūpa ité niha omboyecua chupe.

²⁰ Ēgüe ehi eté Tūpa recocuer ndoyecuai vahe oyecua rumo mbahe sembiapo pipe. Supi eté yamahe mbahe sembiapocuer ivi apo ramo suive oime vahe rese. Sese yaicua ahe Tūpa ité secoi iyavei ipĩratasa apirēhi vahe. Sese ava angaipa viyar ndiyai, “Eñemosañño tēi rane oreu” ehi vaherā yuvireco chupe. ²¹ Esepia, yepe ahe oicua tēi Tūpa yuvireco viña, nomboetei rumo Tūpa secosa rese. “Aviye ndeu” ndehi avei yuvireco chupe. Iyavei ipihañemoñeta mbahe ēgüe ehi tēi vahe rese. Ipipe sui mbahe ndosenducua catu iri eté yuvireco.

²² Yepe, “Ore mbahecua vai” ehi tēi viña, ndoicuai eté rumo mbahe ipipe yuvireco. ²³ Esepia, ahe Tūpa nomanoi vahe seco porañete vahe mboetei rāgüer sui, omboetei ava ocañi tēi vaherā rahanga yuvireco iyavei vīrai, opacatu mbahe mimba, mboi tēi avei omboetei yuvireco.

²⁴ Sese Tūpa, “Toyapoño ité mbahe güemimbotarai yuvireco” ehi chupe. Ichui oyapo ité mbahe poromochisa guasu oyeupe oyemboeteiēhisa pipe yuvireco. ²⁵ Esepia, mbahe supi vahe reroya

rãgüer sui temira tēi viroya catu yuvireco. Iyavei Tūpa ité mboyeroya rãgüer sui omboetei catu mbahe sembiapocuer tēi yuvireco. Yaposar ité ru timboeteisa catu yepi.

²⁶ Sese Tūpa opoi eté ichui, “Toyapoño poromochisa mbahe tēi güemimbotarai pīpe yuvireco” ehi chupe. Evocoyase cuña avei cuimbahe rese güeco rãgüer sui yuvirecoi oyese ae. ²⁷ Cuimbahe avei cuña rese güeco rãgüer sui yuvirecoiño avei oyese ae iyavei oipota raiño ité evocoi güeco raisa yuvireco. Evocoi nungar aposa sui oyemomara ahe ae yuvireco.

²⁸ Iyavei, “Tūpa supi eté vahe” ndehise seroyaēhisa pīpe yuvireco, Tūpa evocoyase opoi eté ichui ‘toyapoño ayase mbahe ndipotasai vahe güeco raisa pīpe yuvireco’ oya chupe. ²⁹ Ahe evocoyase yuvirecoi opacatu mbahe-mbahe tēi pīpe; oyemboaguasa-guasa tēi vahe cuimbahe, cuña avei, ambuae ava mbahe oipota rai iyavei oyapo mbahe-mbahe tēi ava upe. Ahe oñemoiro ambuae ava mbahe pota raisave tēi, oporapichi, ivava serai, iporombopa serai, ipihañemoñeta ava reco momara āgua tēi iyavei imahechiroi ai ipīpe yuvireco. ³⁰ Iyavei ambuae ava cupe cotive mara ehi-ehi tēi vahe, ahe Tūpa amotarēhisar yuvirecoi, viroiro avei ava, oyemboivate ai, oyeecomboivate ai tēi avei oñehe pīpe yepi, oseca-seca tēi mbahe naporai vahe güembiaporã, nomboyeroyai avei oyesupa yuvireco, ³¹ ndoyapisaca potai eté Tūpa suindar ñehesa rese, nomboavīyei avei oñehe, ndosaisui avei que ava, niñeroi avei ava upe, ndoiparaisuerecoi eté ava yuvireco. ³² Oicua

tēi Tūpa “oimera evocoi nungar aposar upe cañisa” ehi vahe, oyapo vîteño rumo mbahe tēi yuvireco iyavei ambuae ava oyapose mbahe tēi, ovihareteño sepiase yuvireco.

2

Tūpa omondo ava upe sembiapogüer rupi tupri ité

¹ Oimese que pe pāhu pendar ‘co oyapo mbahe tēi; tocañi’ ohesave ambuae upe, ahese ahe ae oyemocañi tēi uca. Esepia, ahe inungar tupri avei. ² Yaicua rumo Tūpa omocañise evocoi nungar mbahe tēi aposar recocuer, ahe evocoyase oyapo mbahe supi tupri vahe. ³ Pe opase ava recocuer pesenoi, pe avei rumo ãgüe peye tupri peico. Pe avei eté evocoyase ndapeñemi chitera Tūpa ñemoirosa sui. ⁴ ¿Peroñro tie Tūpa oyapo vitesese mbahe aviye vahe oñemosase, seco mbegüe tupri ai vitesese avei pēu? ‘Tosecuñaro güecocuer yuvireco’ oyapave rumo ãgüe ehi pēu. ⁵ Pe rumo pepiharāta vîteño ité Tūpa upe pe yevi potaēhi āgua. Sese pereco catu vîteño ité Tūpa ñemoirosa peyese, acoi ari oyepotase Tūpa güeco tupri sa pipe yande renoipara yande mocañi āgua, anise yande pĩsiro āgua curi. ⁶ Ahese opara ombopēi ñepeipei yande rembiapogüer rupi yandeu. ⁷ Omboura tecovesa apirēhi vahe yandeu yasecase teco ori, Tūpa suindar poromboeteisa iyavei mbahe apirēhi vahe yande mbahe tupri aposa pipe. ⁸ Ombou aveira oñemoirosa ava ndiporomboyeroyai vahe upe, ahe acoi co ñehesa supi eté vahe reroya rāgüer sui viroya vahe mbahe tēi.

⁹ Judío opacatu mbahe-mbahe tēi aposar ranengatu oiporarara mbahe rasicuer yuvireco, iparera ndahei vahe avei judío. ¹⁰ Tūpa rumo opacatu seco catupri vahe upe omondora imboetei āgua ‘toipisi teco ori iyavei toyuvirecoi mbahe tupri pipe’ oya chupe. Yipindar rumo judío eta upe rane omondora, iparera ndahei vahe judío upe.

¹¹ Esepia, Tūpa ndayande mboyoaviratii yande rereco. ¹² Ēgüe ehi eté, opacatu oyemboangaipa vahe Moisés porocuita porēhi oyemocañi tēira yuvireco. Acoi oyemboangaipa vahe Moisés porocuita rereco pipe yuvireco, ahe porocuita pipe avei opara ocañi tēi porandusave yuvireco coiye. ¹³ Esepia, osenduño tēi vahe porocuita ndahei seco catupri vahe yuvireco. Viroya vahe ité rumo porocuita, ahe seco catupri vahe yuvirecoi. ¹⁴ Supi eté acoi ndahei vahe judío yuvirecoi vahe yepe ndovirecoi co porocuita yuvireco viña, ahe rumo co porocuita rupi tupri oyapose mbahe, ahe evocoyase inungar porocuita vireco vahe yuvireco. ¹⁵ Esepia, güembiapo catupri pipe omboyecua porocuita virecose opiha pipe. Opihañemoñeta pipe avei oyandu porocuita mboaviyesa. Ahe ipipe avei oyandu mbahe güembiavi, ichui avei oyemonguerēhi mbahe aviye vahe apose. ¹⁶ Ahe ari cañi pipe Tūpa oyocuai ucara opacatu ava rembiapo cuaēhisa repri pisi āgua Jesucristo upe, co ñehesa piñirosa resendar amombehu vahecuer rupi tupri ēgüe ehira curi.

Ñehesa judío resendar; Moisés porocuita resendar avei

17 Pe rumo, “Judío aico” peye vahe, peyeroya opacatu Moisés porocuaíta mboaviyesa pîpe pe reco catuprî âgua Tûpa rovaque viña. Iyavei ipîpe peyecomboivate ai Tûpa rese peicose. 18 Peicua semimbotar. Ahe porocuaíta pe mbohe avei mbahe aviye catu vahe poravo âgua. 19 Pe, “Aicatu ité ndasesapîsoi vahe nungar ava ndayaracuai vahe mboaracua iyavei ava angaipa viyar pîtumimbi vahe nungarsave tēi resape âgua” peye tēi. 20 “Aicatu avei ava mbahe ndosenducuai vahe mboaracua iyavei ava chîhivahemi nungar mbohe âgua. Esepia, areco co mborocuaíta vireco vahe opacatu mbahecuasa iyavei mbahe supî tuprî vahe ité” peye tēi avei. 21 Pe pembohe vahe ambuae ava, ¿mahera ru ndapeyembohei pe ae? Pe pemombehu vahe ambuae ava mondaēhi âgua, ¿mahera ru pe ae avei pemonda no? 22 Pe, “Ndiyai pe aguasa” peye; pe teieté avei rumo ēgüe peye. Ndapesepia potai eté mbahe rahanga; pe avei rumo opa peñomi mbahe sepî vahe itûparo pîpe sui. 23 Peyecomboivate ai co mborocuaíta rerecosa rese; ndapemboetei rumo Tûpa ipîpe ahe mborocuaíta mboaviyeēhi pîpe. 24 Supî eté icuachiapri aracadendar pîpe aipo ehi: “Pe sui tēi ava ndoicuai vahe Tûpa iñehe-ñehe tēi serer maranehi rese yuvireco” ehi.

25 Supî eté co tecocuer cuacua circuncisión resendar ahe aviye angara pēu, peroya tuprî itese Moisés porocuaíta viña. Ndaperoya tuprîise rumo, pe evocoyase inungar ndapeyembocircuncidai vahe peico. 26 Acoi ava ndoyembocircuncidai vahe, ahe rumo viroyase porocuaíta, ahe

seroyapri inungar imbocircuncidapri yuvirecoi. ²⁷ Acoi ndoyembocircuncidai vahe, oyapose rumo mborocuaita yuvireco, ahe evocoiyase omombehura pe cañi ãgua yuvireco. Esepia, yepe pereco Tũpa porocuaita viña, pe rumo ndapemboaviyei eté. ²⁸ Judío supi eté vahe yaicose, ndahei yande yesupa judío recocuer rupi güeraño ãgüe yahera. Iyavei circuncisión supi eté vahe ndahei yande retocuer rese güeraño tẽi avei no. ²⁹ Judío ete ité rumo opihá pipe ité viroya Tũpa. Iyavei circuncisión supi eté vahe, Espiritu rembiapo yande pihã pipe, ndahei porocuaita icuachiapri rembiapo tẽi. Evocoiyase judío supi eté vahe oipisira omboeteisa Tũpa suindar ité, ndahei ava tẽi suindar.

3

¹ Evocoiyase, ¿mbahe vo co aviye judío yande reco ãgua? ¿Yande yembocircuncidasa pihã aviye? ² Supi eté. Esepia, yipindar Tũpa omondo oñehe judío eta upe imboaviye ãgua. ³ Amove yepe ipãhu pendar nomboaviyeise ocuaita viña, ¿Tũpa avei tie ãgüe ehira? ⁴ ¡Aní eté! Tũpa rumo supi tupri vahe ité secoi, yepe que ava opacatu semirañete ai tẽi yuvireco. Esepia, icuachiapri aracahendar pipe aipo ehi:

“ ‘Supi tupri vahe Tũpa’ ehira nde ñehe rese yuvireco.

Sese ereiquese ava porandusave, eresẽ tupriñora eso ichui” ehi.

⁵ Yande reco rai pipe tẽi yamboycuase Tũpa reco tupriã, ¿mara yahera vo evocoiyase? ¿“Tũpa ndahei supi tupri vahe yande reco raisa rese yande nupa” yahera tie? (Che rumo aipo ahe

inungar-ra ava co ivi pipendar tēi viña.) ⁶ ¡Aní eté! Esepia, Tūpa ndaheise supi tupri vahe viña, ndiyai chietera yande recocuer rese porandupa tupri āgua chupe viña.

⁷ Aviyeteramo oimera ava aipo ehi vahe: “Yande remira pipe sui tēi ava omboetei catuse Tūpa supi eté vahe, ¿mahera pīha evocoyase angaipa viyar nungar yande rerecora viña?” ehi. ⁸ “Yayapora ayase mbahe naporai vahe mbahe tupri reime āgua” ehi. Amove ava, “Pablo ondugüer reseve aipo ehi eté oporombohe” ehi tupri tēi yuvireco oreu. Aipo ehi tēi vahe rumo. Iya ité oipisira cañisa yuvireco.

Opacatu yande angaipa viyar yaico

⁹ ¿Mara ehi ru evocoyase? ¡Yande judío yaico vahe ndahei eté ivate catu yande recocuer opacatu ambuae ava-ava tēi sui! Esepia, opa amboyecua Tūpa rovaque opacatu angaipa viyar yaico que judío, que ndahei vahe judío avei.

¹⁰ Supi eté icuachiapri aracahendar pipe aipo ehi: “¡Ndipoi eté ava seco catupri vahe, que ñepeí angara viña!

¹¹ Ndipoi avei que ava Tūpa recocuer osenducua tupri vahe.

Ndipoi avei Tūpa oseca vahe yuvireco.

¹² Opacatu ava uguata mbahe tēi pipe yuvireco, co coti tēi avei secocuer yuvireco.

¡Ndipoi eté que ava mbahe tupri aposar, que ñepeí angara viña!

¹³ Iñehesa mbahe tēi eté, inungar tuvipa ndasovapisai vahe.

Oñehesa pipe oporombopa yuvireco.

Ahe ñehesa evocoiyase inungar mboi naporai vahe oporomocañi tēi vahe.

14 Ipipe oñehe rai opihavĩracuá iteangasa pipe yuvireco.

15 Ndayipitii oporapichi ãgua yuvireco.

16 Setá ava omomara, omombaraisu avei oguatasa rupi yuvireco.

17 Iyavei ndoicuai eté güeco tupri ãgua yuvireco.

18 Ndipihanemoñetai eté Tũpa sui osiquiye ãgua yuvireco” ehi.

19 Yande niha opa yaicua opacatu co mbahe omombehu vahe mborocuaita aracahendar pipe, omombehu co porocuaita pipe yuvirecoi vahe upe ‘Che ndayapoi eté mbahe, tehi eme opacatu ava yuvireco’ oyapave, iyavei ‘toicua opacatu ivi rupindar ava Tũpa ñemoĩrosa pisi ãgua yuvireco’ ohesave aipo ehi. 20 Esepia, ndipoi chietera que ñepi seco aviye vahe Tũpa rovaque co porocuaita mboaviye pipe. Ahe mborocuaita rumo oicua uca yande angaipa viyar yande reco.

Cristo rese yande yeroya pipe Tũpa yande pĩsirora

21-22 Cũritei rumo Tũpa oicua uca yandeu ndahe iri mborocuaita mboaviye pipe seco catupri vahe nungar yande rerecora. Cristo rese yande yeroyasa pipe sui niha seco catupri vahe nungar yande rereco. Ahe niha ndayande mboyoavi eté. Yipive ité ahe imombehupri secoi porocuaita aracahendar pipe, iñehe mombehusareta rembicuachi-agüer pipe avei. 23 Supi eté yande opacatu yayapo angaipa, ndayasupitii eté Tũpa reco porañetesa.

24 Ahe rumo oporoaisusa pipe, “Ereyavi mbahe

che ñemoirosa pisi ãgua” ndehi iri yandeu. Esepia, ahe yande pĩsiro uca Guahir Jesucristo upe. Yande rumo ndayamboepi eté yande raisusa chupe. ²⁵⁻²⁶ Tũpa rumo ombou Guahir Cristo oipiyere va-herã vuvi yande angaipa rese ñero ãgua. Sese yande yeroya pipe oime ñeroisa yandeu. Ipipe om-boyecua güeco ñivi tuprisa. Yipisuive rumo güeco asiẽhisa pipe oñemosañõ aracahendar ava angaipa upe; cũritei rumo omboyecua ité güeco ñivisa yandeu, seco ñiviño ité seco catupri vahe yande rere-cose Tahir rese yande yeroya pipe.

²⁷ ¡Evocoiyase ndiyai eté yande yeecomboivate ai ãgua sovaque! Esepia, ndahei porocuita mboaviye rese ãgüe ehi, ahe rumo Cristo rese yande yeroya pipe ãgüe ehi yandeu. ²⁸ Sese yaicua Tũpa, “Ereyavi mbahe che ñemoirosa pisi ãgua” ndehi iri Cristo rese yande yeroyase yandeu, ndahei mborocuita mboaviyesa sui tẽi.

²⁹ ¡Tũpa niha opacatu ité ava Tũpa, ndahei ore judío oroico vahe Tũpa güeraño! ³⁰ ¡Supi eté ñepeño ité seci: sese yayeroyase Cristo rese, oyoya guasuño ité, “Ereyavi mbahe che ñemoirosa pisi ãgua” ndehi chira yandeu, yepera imbocircuncidapri viña, anise que ndahei vahe imbocircuncidapri viña no! ³¹ Ndahei rumo, “Ëgüe ehi tẽi vahe” yahe evocoi mborocuita upe Jesucristo reroyasa pipe. Ipipe rumo yamboyecua evocoi mborocuita ãgüe ndehi tẽi vahe.

4

Abraham recocuer sui yembohesa

¹ Iyavei, ¿mara ehi pĩha yande ramoi Abraham recocuer aracahe? ² Acoi mbahe güembiapo pĩpe sui tẽi oipĩsise güeco tuprĩ ãgua Tũpa sui, oyemboivate aira oico ipĩpe viña. Ndiyai eté rumo ěgũe ehi Tũpa rovaque. ³ Esepia, icuachiapri arachendar pĩpe aipo ehi: “Abraham oyeroya ité Tũpa rese. Sese Tũpa, ‘Co seco catupri vahe’ ehi chupe” ehi. ⁴ Co rumo yande yayapose mboraviqui, ahe yaipĩsi vahe ndahei porerecosa tẽi, ahe rumo mboraviqui repri ité yaipĩsi. ⁵ Yande rumo, yayeroyase Tũpa rese, Tũpa evocoyase yande pĩsira, ‘co seco catupri vahe’ ohesave. Esepia, ahe ěgũe ehi vahe ité oyese oyeroya vahe upe, yepe ndoyapoi chira mbahe aviye vahe chupe viña. ⁶ David mborerecuar arachendar avei oñehe ava rorivetesese rese Tũpa seco catupri vahe nungar pĩsisa rese. Ahe rumo ndahei mbahe sembiapogũer rese tẽi oipĩsi. ⁷ Ahe aipo ehi aracahe:

“¡Sorivete acoi ava Tũpa iñeroise yangaipa rese, iyavei ndoyemomahenduha irise yangaipa rese chupe!

⁸ ¡Sorivete avei ava, ‘Nde angaipa viyar ereico’ ndehi irise Tũpa chupe!” ehi.

⁹ Co mbahe tupri rumo ndahei judío upeño, ahe rumo ava ndahei vahe judío upe avei. Supi eté Tũpa, “Co seco catupri vahe secoi” ehi Abraham upe oyese iyeroyasa rese. ¹⁰ ¿Marase pĩha oipĩsi oyeupe nara sereco? ¿Oyembocircuncida renondeve pĩha, anise ipare tie? Yipĩve ité. ¹¹ “Toicua ava co seco catupri vahe che rese iyeroyase yuvireco” ehi Tũpa chupe. Sese imbocircuncidapri secoi. ěgũe ehi Abraham opacatu ava oyeroya vahe Tũpa rese,

ndoyembocircuncidai vahe yesupa nungar seci. Ëgüe ehi Tūpa, “Co seco catupri vahe yuvirecoi” ehi avei ahe ava upe. ¹² Supi eté yande ramoi Abraham opacatu ava oyembocircuncida vahe, Tūpa rese oyeroya vahe yesupa avei seci. Abraham rumo oyeroya vahe Tūpa rese ndoyembocircuncida vîteiseve.

Tūpa remimombehu imboaviyesara sese yeroyasa pipe

¹³ Esepia, aracahe Tūpa aipo ehi Abraham upe, ichuindar upe avei: “Peipisira opacatu co ivi pe mahera” ehi. Ndahei Moisés porocuita mboyeroya pipe ëgüe ehi chupe, oyese yeroyasa pipe sui eté rumo ahe oipisi ‘co seco catupri vahe’ ohesave. ¹⁴ Supi etese co mborocuita mboyeroysasar güeraño oipisise co mbahe oime vaherã chupe viña, evocoyase yande yeroyasa Tūpa rese ëgüe ehi tēi etera, Tūpa remimombehugüer evocoyase ëgüe ehi tēi vahe aveira viña no. ¹⁵ Esepia, co mborocuita mboaviyeëhisa pipe ñemoirosa oime ava upe. Ndipoise rumo mborocuita, ndipoi chietera ahe porocuita mboyeroyaëhisa.

¹⁶ Sese mbahe Tūpa remimombehugüer porerocosa yaipisira sese yande yeroyasa pipe, ahe semimombehugüer supi tupri vahe opacatu yande Abraham suindar upe nara. Esepia, ndahei mborocuita mboyeroysasar upe güeraño, ahe rumo opacatu yande Abraham nungar Tūpa rese oyeroya vahe upe nara. Evocoyase ahe opacatu yande ramoi seci. ¹⁷ Icuachiapri aracahendar pipe aipo ehi: “Orombou ava eta ivi rupindar ramoirã” ehi. Co Tūpa niha Abraham rembieroya,

ahe avei omoingove vahe omano vahecuer iyavei oyapo vahe mbahe ndipoi vahe yipindar.

¹⁸ Yepe yavai eté seroya ãgua viña, Abraham rumo oyeroya ité Tūpa oyeupe ñehesa rese; sese ava eta ivi rupindar ramoi eté seci Tūpa ñehe: “Setá oimera ava nde suindar” ehi vahe rupi tupri ité. ¹⁹ Abraham evocoyase ndasesarai eté oyeroya tuprisa sui, yepe vireco pota ité cien araviter viña. Iyavei oyoya güembireco reseve nañaroi eté guahi ãgua yuvireco viña. ²⁰ Ndopoi eté Tūpa oyeupe ñehesa reroyasa sui. Ahe rumo oyeroya catu ité sese iyavei omboetei eté. ²¹ “Supi eté Tūpa vireco opiratasa opacatu oñehengagüer mboaviye ãgua” ehiño ité opiha pipe. ²² Sese Tūpa, “Co seco catupri vahe seci” ehi iyeroyasa rese chupe.

²³ Co ñehesa ndahei Abraham upe güeraño. ²⁴ Yandeu avei niha. Esepia, “Co seco catupri vahe” ehi avei yandeu yayeroyase sese. Ahe niha acoi ombogüerayevi vahe yande Yar Jesús. ²⁵ Esepia, ahe imondopri seci yande angaipa repirã. Ipare Tūpa ombogüerayevi yande pisi ãgua seco catupri vahe nungar oyeupe.

5

Tūpa, “Peyavi mbahe” ndehi iri

¹ Sese yaico mbahe tupri pipe Tūpa, “Peyavi mbahe” ndehi irise yandeu yande Yar Jesucristo rembiapo sui sese yande yeroyasa pipe. ² Esepia, Jesucristo sui niha yareco co Tūpa suindar porovasasa yayeroyase sese. Ipipe avei yayemoviracuaño ité yaico, yayemboviha avei.

Esepia, yaicua Tūpa piri yande reco ãgua imbor-
erecuasave. ³ Ndahei rumo sese güeraño yayem-
bovîha, yande yemombaraisusa rese avei niha
yayembovîha yaico. Esepia, yaicua ahe yande
mbohe yande ñemosã ãgua, ⁴ iyavei yañemosañose,
yasẽ tuprîra yande recoãhasa sui, ahese yaicua
yaipîsi vaherã mbahe aviye vahe Tūpa suindar
yepi. ⁵ Iyavei ahe yande remiaro nayamoha tẽi
chira sereco. Esepia, Tūpa ombou ité oporoaisusa
yandeu oEspíritu Santo yandeu ombou vahe pipe.

⁶ Yande ae ndayaicatui yande ñepisiro ãgua
yande recocueraî sui, Cristo rumo osupitise
ari chupe, omano opacatu yande angaipa rese.
⁷ Aviyeteramo oimera que ñepi ava omano
vaheã ambuae ava aviye vahe upe nara; yepe
que ava recocuer supi eté aviye aira viña, seni
rumo ndipoi eté que ava, “Che tamano sepîrã”
ehi vaheã chupe. ⁸ Yepe yande angaipa viyar
yaico yipîndar, Tūpa rumo omboyecua yande
raisusa; ombou Cristo imano ãgua yande angaipa
repîrã. ⁹ Ipîpe sui cūritei, “Peyavi mbahe” ndehi
iri chira. Sese nomboui chietera oñemoïrosa
yandeu. ¹⁰ Esepia, yamotarẽhimbar yaico vïtese,
ahe Guahir manosa pipe sui yande reroyevi iri
oyeupe mbahe tuprî pipe; ocuerayevîsa pipe
evocoyase oicatu ité yande pîsîro. ¹¹ Ndahei co
reseño êgüe yahera, yavîha catu aveira Tūpa rese,
yande Yar Jesucristo rese avei. Ichui niha ndipo
iri mbahe Tūpa rovaque yande rese.

Adán iyavei Cristo resendar ñehesa

¹² Supi eté Adán sui oime angaipa ivî pipe, ichui
avei oime manosa opacatu ava upe. Esepia,

opacatu ité oyapo angaipa yuvireco. ¹³ Ndipo viteise Moisés porocuaíta, oime voi eté angaipa co ivi pipe. Yepe tie ndicuasa vitei angaipa porocuaíta ndipoise viña, ¹⁴ Adán reco sui tupri ité rumo ava omanoño ité oangaipa pipe yuvireco. Ëgüe ehiño ité yuvireco Moisés recose, yepe ahe ava yuvirecoi vahe angaipa ndahoyoyai Adán angaipa mborocuaíta mboaviyeēhisa resendar rese viña. Ahe Adán rese omboyecua mbia ou vaheṛā.

¹⁵ Tūpa porerecosa ombou vahe rumo yandeu ndahoyoyai eté Adán angaipa rese. Esepia, Adán rembiavi sui setá ava omano; Jesucristo rembiapo sui rumo Tūpa ombou oporerecosa poropĩsirosa yandeu. Ahe rumo aviye catu vahe ava eta upe nara. ¹⁶ Ahe ñepei ava angaipa rumo ndoyoyai eté Tūpa poropĩsirosa ombou vahe rese yandeu. Esepia, ñepei ava angaipa sui ou Tūpa ñemoirosa; oporerecosa rumo Tūpa ombouño ité ava eta mbahe oyavi ati vahe upe nara yangaipa mocañi āgua. ¹⁷ Supi eté ñepei ava angaipa sui oimeño ité manosa opacatu yandeu. Yande rumo yaipisi mbahe ipĩrata catu vahe ichui, ahe Tūpa porovasasa tuvichá vahe ité iyavei iporerecosa, “Peyavi mbahe” iheēhisa resendar. Sese yareco ité tecovesa apirēhi vahe yandeyeupe nara ñepei ava sui, ahe Jesucristo.

¹⁸ Evocoiyase inungar Adán rembiapo ai güeru Tūpa ñemoirosa opacatu ava upe, Jesucristo rembiapo aviye vahe avei güeru opacatu ava upe Tūpa ñemoirosa pisiēhi āgua ‘tovireco tecovesa apirēhi yuvireco’ oya. ¹⁹ Esepia, ñepei ava Tūpa reroyaēhisa sui setá oime ava angaipa viyar; ěgüe

ehi aveira ñepi ava mboyeroyasa sui setá aveira
ava vireco güeco catuprisa Tūpa rese yuvireco.

²⁰ Supi eté porocuita ouse aracahe, ahese
angaipa yaposa catu ité. Yepe êgüe ehi viña,
Tūpa porovasasa rumo ivate catu ité ichui.

²¹ Evocoyase inungar angaipa ipĩrata yandeu
yande mano ãgua viña, êgüe ehi avei rumo
Tūpa oporovasasa ipĩrata vahe pĩpe yande pĩsi
seco catupri vahe nungar yande rereco 'toipĩsi
tecovesa apĩrẽhi vahe che Rahir Jesucristo
rembiapo sui' oya.

6

*Angaipa upe omano vahe nungar yaico; Cristo
rese yaicose rumo oicove vahe ité yaico*

¹ Evocoyase, ¿iya iri pĩha yayapo vite angaipa
yaico Tūpa yandeu oporovasasa mboyecua
catu ãgua? ² ¡Aní chietera! Esepia, yande niha
senosepri angaipa sui. Evocoyase ndiya iri eté
yayapo viteño angaipa yaico. ³ ¿Ndapeicuai vo
pe yañeapiramose Jesucristo rer pĩpe, ndoyavii
yamano vahe ité sese? ⁴ Yande ñeapiramose,
aviye acoi ñotimbri yaico Cristo rupive yande
mbogüerayevi iri ãgua iyavei yande recocuer
mopiasu ãgua avei, inungar acoi Cristo ocuerayevi
Vu reco pĩratasa pĩpe.

⁵ Yande omano vahe nungar yaicose supive,
êgüe vahe aveira yande yacuerayevi supi. ⁶ Yaicua
avei niha yipindar yande recocuerai yaticapri
nungar curusu rese Cristo rupive, "Che recocuerai
toañipa che sui" yande hesa pĩpe, iyavei yande
angaipa pĩpe mbiguai tẽi nungar yande recoẽhi

ãgua. ⁷ Esepia, acoi omano vahe ndoyapo iri angaipa yuvireco. ⁸ Yande avei niha omano vahe nungar Cristo rese yaico. Evocoyase yayeroya avei yaicove vaheã sese. ⁹ Yande niha yaicua, Cristo ñepei reseve ocuerayevi, nomano iri chietera. Esepia, manosa ndoicatu iri eté chupe. ¹⁰ Supi eté omanose Cristo, omano ñepei reseve opacatu angaipa mocañi ãgua; cūrítei rumo oicove Tūpa upe nara. ¹¹ Ēgüe peye avei pe, “Che omano vahe nungar aico angaipa upe” peyera; “Che rumo Tūpa upeño ité aicovera yande Yar Jesucristo rese che recosa pipe” peye aveira.

¹² Sese aní peico vite angaipa pīratasavri ve pe cuai ãgua pe remimbotarai mboyeroyasa pipe. ¹³ Aní peyemondo angaipa upe mbahe tēi apo ãgua. Peyemondo catu Tūpa upe. Esepia, pe inungar ava ocuerayevi iri vahe peico. Sese peyemondo tupri ité Tūpa upe mbahe tupri apo ãgua. ¹⁴ Evocoyase, pe angaipa ndape cuai iri chira pe rereco. Esepia, ndapeicoi Moisés porocuita pipe; pe rumo Tūpa porovasasa pipe peico.

Yembohesa mbiguai tēi recocuer sui

¹⁵ Ndayaico iri mborocuita pipe tēi, yaico rumo Tūpa porovasasa pipe. Evocoyase, ¿“Tayapo vite angaipa” yahera pīha? ¡Aní chietera! ¹⁶ Pe niha peicua que ava pemboyeroyase, ipovri pendar evocoyase peico. Pemboyeroyase Carugar angaipa apo ãgua, ahe evocoyase pe reco mocañi tēira. Tūpa pemboyeroyase rumo, ahe evocoyase pe reco mohivira. ¹⁷ Aviye Tūpa upe. Esepia, pe yipindar mbiguai tēi nungar peico angaipa pipe viña, cūrítei rumo pemboyeroya pe pihave

ité porombohesa peipisi vahe. ¹⁸ Ñepeí reseve pe angaipa sui Tũpa pe renosese, pe evocoíyase mbiguai nungar mbahe supi tupri vahe apo ãgua peico. ¹⁹ (Che amboyoya tecocuer mbahe co ivi pipendar rese imombehu pẽu. Esepia, yavai vite ité pẽu co ñehesa renducua tupri ãgua.) Yipindar pe retocuer pereco mbahe tẽi pipe mbahe naporai vahe apo ãgua. Ëgũe peye rumo pe cũritei pe reco mohivi ãgua peico mbahe tupri pipe ñepeí reseve Tũpa upe pe reco ãgua.

²⁰ Pe peico vitesese mbiguai tẽi nungar pe angaipa pipe, ahese ndapeyapo vitei mbahe supi tupri vahe; ²¹ cũritei rumo pechĩ tẽi ichui, ahe niha ndape pĩtívii eté pe recocuer rese, iyavei pe reraso pota manosa apirẽhi vahesave yepi. ²² Cũritei rumo angaipa sui senosepri peico Tũpa povrive pe reco ãgua. Ichui mbahe tupri oime pẽu. Ahe niha ombou oyeupe nara ité pe reco tupri ãgua. Ipipe sui peicora apirẽhi vaheerã. ²³ Angaipa niha ombou manosa tẽi yandeu, Tũpa rumo oporerecosa ombou tecovesa apirẽhi vahe yandeu yande Yar Jesucristo rese yande recose.

7

Mendasa sui yembohesa

¹ Che rivireta, pe niha peicua tupri mborocuita, peicua avei ahe porocuita povriveño ité opacatu yaico yaicove vitesese co ivi pipe. ² Esepia, inungar cuña omenda vahe, imer oicove vitesese, iporocuitavrive viteño ité secoi yepi. Omanose rumo imer ichui, ahe cuña ndahe iri omer porocuitavrive secoi. ³ Acoi cuña omer

recove vïteseve, vïrecose ambuae cuimbahe, oyemboaguasa tēi evocoyase; acoi omanose rumo imer ichui, ndaseco iri ipovrïve. Ahe iyacatu ité omenda yupagüe iri; ahese ndahei yaguasa tēi cute.

⁴ Che rïvïreta, pe niha ãgüe peye avei Cristo rese peico vahe; Cristo manosa sui ndahe iri Moisés porocuitavrïve peico Cristo rese peico ãgua. Ahe niha acoi ocuerayevï vahe. Sese yande recocuer ãgüe ndehi tēi vahe Tūpa upe. ⁵ Esepia, yande yaicove vïtese yande reco ai pïpe, ahe porocuita renduse, yaipota catu mbahe tēi pïpe yande reco ãgua. Ipare rumo ahe manosave tēi yande reraso ucara viña. ⁶ Cūritei rumo yande omano vahe nungar yaico acoi porocuita pïpe yaico vahecuer sui. ãgüe yahe, yasē ichui Tūpa upe mbahe apo ãgua Espïritu sui yande reco pïasu pïpe. Ndahe iri mborocuita icuachiapri yïpïndar vahe pïpe yaico.

Angaipa oime vahe yande rese

⁷ ¿“Tūpa porocuita angaipa” yahera pïha? ¡Aní eté; ndahei eté ahe angaipa! Co rumo ndaicuai chïetera che angaipa Tūpa porocuita ndïpoise viña. Supi eté che ndaicuaise, “Ndapeipota rai chira ambuae ava mbahe” ehi vahe mborocuita pïpe, ahese ndaicuai chïaveira che mbahe pota raisa viña. ⁸ Aicuse mborocuita, ahese angaipa ipïrata catu cheu. Ahe mborocuita apo potaēhïsa pïpe che querēhï catu opacatu che remimbotarai tēi apo ãgua. Esepia, mborocuita porēhï angaipa avïye ndïpoi vahe viña. ⁹ Yïpïndar Tūpa porocuita ndaicua vïteise, ndoyavïi avïye vahe ité che reco

areco viña. Porocuaíta aicuaſe rumo, aipota rai angaipa apo ãgua. ¹⁰ Che evocoiyase acañi tēi vaheṛã aico ipipe viña. Ahe porocuaíta che recove apirēhi ãgua mbou rãgüer sui, che mondo ucaño itera manosa apirēhi vahe pīpe tēi viña. ¹¹ Eſepia, angaipa ahe porocuaíta pīpe che mbopa ité. Ahe ipipe avei che mocañi tēira viña.

¹² Evocoiyase co porocuaíta ndaseco marai vahe ité, supī tupri vahe ité, aviye vahe avei. ¹³ ¿Co porocuaíta aviye vahe pīha che rereco che mano ãgua tēi? ¡Aní eté! Angaipa tēi rumo ěgüe ehi che rereco. Evocoiyase co porocuaíta cuasa sui oipota catu uca mbahe tēi apo ãgua cheu. Ipipe aicua angaipa oime vahe che rese. ěgüe ehi avei ahe porocuaíta omboyecua tupri ité angaipa mbahe tēi vahe yandeu.

¹⁴ Yaicua niha porocuaíta Tūpa suindar, che tēi rumo imondopri aico angaipa mboyeroya ãgua. ¹⁵ Che rumo ahese ndaicuai mbahe oime vahe cheu. Eſepia, che remimbotar ayapo pota vahe ndayapoi; mbahe che remimbotarēhi rumo ayapo. ¹⁶ Che rumo ayapose mbahe ndayapo potai vahe, ahese aicua co porocuaíta aviye vahe. ¹⁷ Evocoiyase ndahei cheyesui eté ěgüe ahe, angaipa tēi rumo ěgüe ehi che mbohe uca. ¹⁸⁻¹⁹ Eſepia, che aicua ndipoi eté mbahe aviye vahe che reco ai rese; sese yepe che ayapo pota ité mbahe aviye vahe viña, ndaicutui eté rumo yapo. Iyavei yepe ndayapo potai mbahe tēi viña, che rumo ayapoño ité. ²⁰ Sese ayapo viteño itese mbahe ndayapo potai vahe, ndahei rumo che ité ayapo, che pīha pīpe angaipa oime vahe, ahe tēi

rumo oyapo uca cheu.

²¹ Sese che aicua oime che cuaisar che rese. Esepia, ayapo potase mbahe aviye vahe yepi viña, ahe rumo oyapo uca pota voiño ité mbahe naporai vahe cheu yepi. ²² Che piha pipe rumo Tũpa porocuita aipotá iteanga tẽi, ²³ che rumo aicua che piha pipe oime ambuae mbahe, mbahe tupri apo potaẽhisar cheu, ahe angaipa tẽi oime vahe che rese. Ahe mbiguai nungar tẽi che rereco.

²⁴ “¡Che paraısu ité!, ndaicatu iri eté, ¿uma piha co mbahe tẽi sui che renosera viña?” ahe cheyeupe vichico. ²⁵ Tũpaño ité oicatu Guahır Jesucristo rese. “Aviye” yande Ru Tũpa upe. Ēgüe ehi ahese mbahe cheu; Tũpa porocuita amboaviye pota viña, che remimbotarai tẽi rumo che rereco uca angaipa povrive.

8

Yaico vaherã Tũpa Espıritu rese

¹ Cũritei rumo ndipo iri Tũpa ñemoirosa yandeu Jesucristo rese yaicose. ² Esepia niha, Jesucristo rese yaicose, yande cuaisar Espıritu tecovesa mondosar yande renose angaipa povri sui, manosa sui avei. ³ Esepia, yande remimbotarai rese ndayaicatu Moisés porocuita mboyeroya ãgua, ahe avei evocoyase ndoicatu eté yande reco moingatu. Tũpa rumo oicatuño ité. Esepia, Guahır ombou yande nungar tupri ité ‘toyemondo ava angaipa repirã’ oya. Ēgüe ehi imocañi opacatu yande angaipa yande sui, yande remimbotarai avei. ⁴ Ahe ěgüe ehi yande yamboaviye vaherã mborocuita.

Esepia, ndayaico iri yande remimbotar tēi pīpe. Yaico rumo Espiritu aviye vahe rese.

⁵ Esepia, acoi yuvirecoi vahe rumo güemimbotar tēi pīpe, güecocuerei reseño tēi ipihañemoñeta yuvireco; Espiritu rese yuvirecoi vahe rumo semimbotar rese ipihañemoñeta catu yuvireco.

⁶ Iyavei acoi güemimbotarai rese tēi ipihañemoñeta vahe, ahe omano itera apirēhi yuvireco. Ipihañemoñeta vahe rumo Espiritu suindar mbahe rese, virecora tecovesa apirēhi vahe mbahe tupri pīpe yuvireco. ⁷ Esepia, acoi güecocuerei reseño tēi ipihañemoñeta vahe, ahe Tūpa amotarēhimbar yuvirecoi. Ndoipotai eté iyavei ndoicatui Tūpa porocuita mboyeroa āgua yuvireco. ⁸ Ēgüe ehi eté, acoi yuvirecoi vahe güemimbotarai pīpe, ndoicatui eté Tūpa remimbotar apo āgua yuvireco.

⁹ Pe rumo ndapeico iri pe remimbotarai pīpe. Peico rumo Tūpa Espiritu rese, ahe perecose peyese. Acoi ndovirecoi vahe rumo Espiritu Cristo suindar, ndahei eté chupendar. ¹⁰ Cristo secoise rumo pe rese, yepé pe rete ocañi tēi va-

herā angaipa sui viña, pe espíritu rumo oicoveño ité. Esepia, Tūpa, “Peyavi mbahe” ndehi iri pēu.

¹¹ Acoi Tūpa Espiritu secoise pe rese, Tūpa evo-coiyase omondora tecovesa piasu pe retecuer upe oEspiritu pe rese secoi vahe pīratasa pīpe. Esepia niha, ipīpe ité ombogüerayevi Guahir Jesucristo.

¹² Ēgüe ehi che rivireta, yareco yande cuaita, ndahei rumo yande remimbotarai pīpe yande reco āgua. ¹³ Esepia, pe peicoño itese pe remimbotarai pīpe, ahese pecañi tēira; pemombopase rumo

Espíritu pìpe peyesui, ahese peicovera apirēhi va-herã.

¹⁴ Esepia, opacatu Tũpa Espiritu ombohe vahe, Tũpa rahir ité yuvirecoi. ¹⁵ Supi eté pe Espiritu peipisi vahe ndapembosiquiye uca iri pe rereco, ahe rumo pemoingo Tũpa rahir ité pe reco ãgua. Ahe avei, “¡Che Ru!” pe mbohe uca chupe. ¹⁶ Co Espiritu avei oicua uca yande espiritu upe Tũpa rahir yande recose. ¹⁷ Evocoyase yaipisi aveira mbahe yande Ru Tũpa ombou vaheerã yandeu; ahe oyoya Cristo reseve yaipisira, Cristo paraisu agüer pìpe ité yaicose yareco vaheerã teco porañetesa ipiri curi.

Teco porañetesa ou vaheerã curi

¹⁸ Cũritei rumo yande paraisusa ndoyoyai eté teco porañetesa yande rese ou vaheerã rese. ¹⁹ Opacatu Tũpa rembiapocuer osãro vite ité opacatu oquerēhisa pìpe, osepia pota ité teco porañete vahe tahir yuvirecoi vahe rese. ²⁰ Esepia, Tũpa rembiapo ndahe iri eté yipindar nimarai vahe nungar. Ndahei rumo oyesui tēi ěgüe ehi, Tũpa ité, “Ěgüe tehi” ehi chupe, ombouse angaipa repri ava upe. Mbahe sembiapocuer rumo osãroño ité ²¹ güeco opa tēi vaheerã sui ñepisiro ãgua teco porañete vahe Tũpa rahir vireco vahe rupiti ãgua curi. ²² Yande niha yaicua aracahe suive opacatu mbahe Tũpa rembiapo oiporara mbaherasicuer yuvireco cuña imembi rasi vahe nungar. ²³ Ndahei rumo ahe güeraño ěgüe ehi yuvireco, yande avei ěgüe yahe. Yande yareco ité Espiritu, ahe yipindar vahe yaipisi vaheerã ichui curi. Yayemombaraisu, yasãro vite yande

querẽhisa pipe Tũpa guahir ité yande rereco ãgua, yande retecuer recuñaro ãgua avei. ²⁴ Esepia, yande niha yañepisiro ité yande remiaro reroya pipe; sese acoi yasepia vahe mbahe yande remiaro, nayasãro iri. Ndipoi ava osãro vite tẽi vahe mbahe güembiepia. ²⁵ Acoi mbahe yande remiaro ndayasepia viteise rumo, yasãro vite yande ñemosasa pipe sereco.

²⁶ Ëgüe ehi avei Espiritu yande pĩtivĩ ndayaicatu irise. Esepia, ndayaicuai eté mara yahera yayeroqui, co Espiritu Santo rumo oporandu ité Tũpa upe yande rese oyemopoasesa pipe. ²⁷ Iyavei Tũpa, ahe oicua vahe opacatu yande pihañemoñetasa, oicuaño ité Espiritu mbahe omombehu pota vahe oyeupe. Esepia, Espiritu oporandu chupe semimbotar rupi yande seroyasar yaico vahe rese.

Yasecopipa itera mbahe tẽi

²⁸ Tũpa niha yande poravo güemimbotar rupi. Yepe yaicua mbahe tẽi oime yandeu viña, Tũpa rumo opacatu mbahe oyapo yandeu mbahe tupri reime ãgua yande raisusave. ²⁹ Esepia, yipive Tũpa yande cua, yande poravo Guahir Jesucristo nungar ité yande reco ãgua ‘ahe che Rahir tenonde catu vahe tasecoi opacatu ambuae che rahir sui’ oya. ³⁰ Iyavei Tũpa yipisuive ahe yuvirecoi vahe oiporavo. Chupe oñehe oyeupe nara seco ãgua. Ipare, “Co seco catupri vahe” ehi chupe; ahe chupe avei omondo teco porañetesa.

³¹ ¿Mara yahe irira vo chupe? ¡Tũpa niha yande repisar secoi, sese ndoicatu iri eté yande

amotarēhimbar yuvireco! ³² Tūpa niha ombou ité Guahir imano āgua opacatu yande rese. Sese yaicua ombou aveira opacatu mbahe yandeu yande pītivī āgua Tahir rese yande recose. ³³⁻³⁴ Sese ndiyai eté ava upe, “Pecañi tēira, peyavi pe recocuer” ihe āgua yande iporavopri yaico vahe upe yuvireco. Esepia, Tūpa opa omocañi yande angaipa yande sui Cristo omanose sepirā, iyavei ocuerayevise. Cūritei Cristo Vu acato coti, “Co cheundar ité yuvirecoi” ehi yande rese oyerure yepi. ³⁵ ¿Mbahe pīha yande mboyepēira Cristo yande raisusa sui viña? ¿Que yande paraisusa, mbahe yavai vahe yandeu, yande momara-mara tēisa, que tieporēhi, anise que yande turucuarā ndipoise, que mbahe tēise yandeu, yande yuca potase tie yuvireco? ³⁶ Inungar icuachiapri arachendar pipe aipo ehi:

“Oyemoingatu voi ari rupi yande yuca āgua yuvireco ndeundar yaicose, ovesa yucapirā nungar tēi yande rereco yuvireco” ehi aracahe.

³⁷ Opacatu rumo co mbahe oimese yandeu, yasecopipa ité ahe yande raisusar recocuer pipe sui. ³⁸ Sese che aroya ité Tūpa yande raisu viteño itera yepi yepe que yamanora, anise que mbahe oime vahe yandeu yande recove vitesē. Ndayande mboyepēi chiaveira ichui que Tūpa rembiguai, que seco ivate vahe, seco pīrata vahe ndayasepiaī vahe, que cūritei mbahe oime vahe yandeu, anise que mbahe oime vahe rī. ³⁹ ¡Ndayande mboyepēi chiaveira que iba pendar mbahe, anise que mbahe ivi pīendar, que ambuae mbahe Tūpa rembiapo iporoaisusa sui

omboyecua vahe opacatu yande Yar Jesucristo recocuer pipe yandeu!

9

Tũpa oiporavo Israel oyeupe nara arácahe

¹ Che Cristo reroyasar che reco pipe supi eté añehe, ndopombopai. Tũpa Espíritu oicua ité che pihañemoñetasa supi vahe. ² Ndavihai eté che pihá pipe; oime mbahe tasi vahe cheu yepi. ³ Che aipota tẽi opacatu che mu judío ñepisiro ãgua yuvireco viña. “Tacañi tẽi Cristo porẽhi icañi tẽiẽhi ãgua yuvireco” ahera viña. ⁴ Ahe niha Israel suindar yuvirecoi, aracahe Tũpa oiporavo vahe guahirguã. Ahe ipãhuve avei secoi güendigüer porañetesa pipe, iyavei omondo ité oñehe güemimbotar, oporocuita avei chupe nara viña ‘tache mboetei oyeruresa pipe che rêtave yuvireco’ oya, iyavei, “Amboaviye itera che ñehe pe rese” ehi yuvireco chupe. ⁵ Ahe avei niha yande ramoí yipindar vahe suindar yuvirecoi, Tũpa Rembiporavo Poropĩsirosar avei ahe ichuindar oyesu vahe. Ahe Poropĩsirosar niha Tũpa ité, ivate catu vahe secoi opacatu sui. Sese, jtimboeteisa catu yepi! jËgüe tehi apirẽhi!

⁶ “Tũpa nomboaviyei Israel upe oñehe imombe-hupri” ndapeyei chira. Esepia, ndahei opacatu Israel suindar supi tupri vahe. ⁷ Iyavei ndahei opacatu Abraham suindar tahir supi tupri vahe yuvireco. Esepia, Tũpa aipo ehi: “Nde rahir Isaac sui rumo oimera nde suindar so-vasapri” ehi chupe. ⁸ Co rumo osenducua uca yandeu ndahei Abraham suindar yuvinose vaheño ité Tũpa rahir yuvirecoi, Tũpa remimombehu

rupi yuviroha vahe güeraño rumo ichuindar ité yuvirecoi. ⁹ Esepia, Tūpa Abraham upe aipo ehi aracahe: “Co ari rupi avei ayevira curi, ahese oimera Sara membri ndeu” ehi.

¹⁰ Ndahei rumo co reseño, tahir Isaac rese avei. Esepia, ocuacuase sembireco Rebeca imembi cōi, ahe icōi vahe yesupa rumo ñepeño ité. ¹¹⁻¹³ Ahe ndoyuviroha viteise, ndoyapo viteise mbahe que aviye vahe, que naporai vahe yuvireco, Tūpa aipo ehi ichi Rebeca upe: “Yipindar oha vahe nde membri ahe omboyeroyara ipandar” ehi. Co oyoya ité icuachiapri rese acoi aipo ehi vahe: “Che asaisu ité Jacob, Esaú rumo ayamotarēhi” ehi. Sese yaicua iya ité Tūpa upe ava poravo güemimbotar rupi, ndahei seco aviye vahe rese.

¹⁴ ¿Sese pīha Tūpa upe, “Ndaseco tupri vahe” yahera? ¡Aní eté! ¹⁵ Esepia, acoi Moisés upe aipo ehi: “Aiparaisuerecora ava, asaisu aveira che remimbotar rupi” ehi. ¹⁶ Supi eté ndahei yande remimbotar rupi tēi, ndahei avei yande pīratasa rupi Tūpa oyapo mbahe; ahe rumo oporoparaisuerecosa pipe mbahe oyapo yandeu. ¹⁷ Supi eté Tūpa aipo ehi mborerecuar guasu Egipto pendar upe aracahe: “Che oromoingue uca mborerecuar nde reco ãgua che pīratasa mboyecua ãgua nde sui, che rer mboetei ãgua avei opacatu ava upe co ivi pipe” ehi. ¹⁸ Ëgüe ehi oporoparaisuereco güemimbotar rupi. Güemimbotar rupi avei omboavai viroya ãgua ava upe.

¹⁹ Aviyeteramo oimera que amove pe pāhu pendar aipo ehi vahe, “Ndiyai evocoyase Tūpa upe, ‘Pe peyavi mbahe’ he ãgua yandeu. Esepia, ndipoi

eté niha ava, ‘¡Aní!’ ehi vaherã Tũpa remimbotar upe” ehira. ²⁰ “Ndiyai eté rumo Tũpa poepi ãgua ndeu” ahera aipo ehi vahe upe. Inungar ñaihu mbahemoinda ndiyai, “¿Mahera che apo rai tẽi eve?” ihe ãgua oaposar upe. ²¹ Ñaihu rese oporaviqui vahe rumo güemimbotar rupi oyapora mbahe yuvireco sese. Oicatu ichui avıye catu vahe apo, oicatu avei ambuae iporupirã tẽi apo ãgua.

²² Tũpa rumo oñemosã pare iya ité oñemoirora, opĩratasa mboyecua ãgua ocañi tẽi vaherã upe.

²³ Ëgüe ehi avei yapo güemimbotar rupi güeco porañetesa ivate vahe mboyecua ãgua yandeu. Esepia, yande paraisuereco iyavei yipisuive teco ori porañetesa omoingatu yandeu aheve yande reique ãgua. ²⁴ Yande avei yande renoi oyeupe, que judío, anise que ndahei vahe judío yande recose. ²⁵ Esepia, Oseas rembicuachiagüer pipe aipo ehi:

“Acoi ava ndahei vahe cheundar, chupe,

‘Cheundar ité’ ahera, iyavei acoi ava ndahei vahe saısupri yuvirecoi, chupe, ‘Che rembiaısu ité’ ahera” ehi.

²⁶ “ ‘Pe ndahei vahe cheundar peico’ ehi vahe-save, ahe chupe, ‘Tũpa oicove vahe rahır ité’ hesara” ehi.

²⁷ Isaías rumo aipo ehi israelita upe: “Yepe Israel suindar setá iteangara viña inungar ivi cuhi, movıro tẽi rumo oñepısırora yuvireco.

²⁸ Esepia, yande Yar omboavıye voira oñehe ava viroyasarẽhi mocañi ãgua co ivi pipe” ehi. ²⁹ Oyoya avei ambuae Isaías remimombehugüer yipındar vahe rese:

“Yande Yar seco pĩrata catu vahe noipĩsiroise que moviro yande ramoi yandeu, yacañipa tẽira viña inungar tecua guasu Sodoma, Gomorra reseve yuvireco” ehi.

Judío yuvirecoi vahe iyavei ñehesa pĩsirosa re-sendar

³⁰ ¿Mara yahera vo evocoyase? Yaicua ava ndahei vahe judío, yepe ndahei osecá vahe güeco catupri ãgua yuvireco viña, Cristo rese oyeroyasa pipe rumo vireco ité güeco catupriisa Tũpa rovaque. ³¹ Judío yuvirecoi vahe rumo oipota tẽi güeco tupri ãgua ité Tũpa porocuita mboyeroya pipe viña, ndoicatu eté rumo supiti yuvireco. ³² Esepia niha, ndahei oyeroyasa pipe ité oseea oñepisiro ãgua, ahe rumo co mborocuita mboyeroysa sui tẽi Tũpa rese yuvirecoi pota viña. Ahe evocoyase ndoyavi oyepiapi vahe “ita yepiapis” rese yuvireco. ³³ Aipo ehi tupri icuachiapri aracahendar pipe:

“Che amondo Sión ve ñepe ita yepiapis, ahe oporoeti vahe.

Acoi sese oyeroyá vahe rumo, nomochi ucai chitera oyesui” ehi Jesús recocuer upe.

10

¹ Che rivireta, che aipota che piha pipe ité iyavei ayerure Tũpa upe che mu judío recocuer rese ‘toñepisiro yuvireco’ che yapave. ² Supi eté iquerẽhi ité Tũpa upe mboraviqui apo ãgua yuvireco viña. Oquerẽhisa sui rumo oyavi senducuaẽhisa pipe yuvireco. ³ Esepia, ndoicua potai

mara ehi Tũpa ava pisi oyeupe. Sese oyesui tẽi oseca güecocuer tupriisa pipe ‘tomoingatu Tũpa opĩha yande pisi ãgua’ ohesave yuvireco viña. Ipipe sui nomboyeroyai eté Tũpa remimbotar güeco mbo-catupri ãgua ité yuvireco. ⁴ Esepia, Cristo recocuer pipe imboaviyesa tupri Moisés porocuita, “Peyavi mbahe che ñemoirosa pisi ãgua” ehiẽhi ãgua Tũpa oyese oyeroya vahe upe.

⁵ Co yande reco catupri ãgua porocuita pipe sui, Moisés aipo ehi icuachía: “Acoi ava omboaviye tupri vahe opacatu co mborocuita, ipipe sui yuvirecovera” ehi. ⁶ Tũpa, “Peyavi mbahe che ñemoirosa pisi ãgua” heẽhi ãgua rumo yande yeroyasa pipe, “Ava vo oyeupira ivave Tũpa Rembiporavo reroyi ãgua” ndapeyei chira. ⁷ Iyavei, “Ava vo ogüeyira omano vahe pãhuve Tũpa Rembiporavo mboyeupi uca ãgua” ndapeyei chiaveira. ⁸ ¿Mara peyera evocoyase pe piha pipe? “Co ñehesa namombriveimi pe sui, pe yuru pipe ité, pe piha pipe avei secoi” peyera. ⁹ “Jesús, che Yar” peyese, pe piha pipe peyeroyase avei Tu imbogüerayevisa rese, ahese ipĩsiropri peicora. ¹⁰ Esepia, yande piha pipe yayeroya Jesús rese. Ahese Tũpa, “Co seco catupri vahe” ehira yandeu. Iyavei yamombehuse sese yande yeroyasa, ahese ipĩsiropri yaicora.

¹¹ Esepia, icuachiapri aracahendar pipe Tũpa aipo ehi: “Acoi sese oyeroyá vahe rumo, nomochi ucai chietera oyesui” ehi. ¹² Sese oyoya tupri judío ndahei vahe judío recocuer rese. Esepia, ñepeño ité niha Yar opacatu ava upe nomopanei vahe oporovasasa tuvichá vahe oyeupe oporandusar

upe. ¹³ Esepia, icuachiapri aracahendar pipe aipo ehi: “Acoi opacatu osenoi vahe yande Yar rer, ipĩsiropri yuvirecoira” ehi. ¹⁴ Ava rumo ndoporandui chira pĩsirosa rese Jesús upe, sese ndoyeroyaise yuvireco. Iyavei sese ndoyeroyai chira sesendar ñehesa ndosenduise yuvireco. Iyavei ndosendui chira ndipoise ñehesa mombehusar yuvireco chupe. ¹⁵ Iyavei mara ehira co ñehesa mombehu yuvireco ndipoise imondosar chupe. Aipo ehi avei niha acoi icuachiapri aracahendar pipe: “¡Aviye ai eté acoi ava güeru vahe ñehesa aviye vahe pĩsirosa resendar!” ehi.

¹⁶ Ndahei rumo opacatu che mu judío viroya co ñehesa pĩsirosa resendar yuvireco. Isaías niha aipo ehi avei aracahe: “Che Yar, ¿uma pĩha viroya ore ñehe yuvireco?” ehi. ¹⁷ Sese yayeroya Jesucristo rese co ñehesa pĩsirosa rendusa pipe.

¹⁸ ¿Osendu pĩha judío co ñehesa yuvireco? ¡Osendu ité! Esepia, aipo ehi avei acoi icuachiapri aracahendar pipe:

“Sendusa niha opacatú ivi rupi iñehe” ehi.

¹⁹ Iyavei, ¿osenducua pĩha yuvireco? ¡Osenducuaño ité! Esepia, yipindar Moisés omombehu icuachiapri pipe aipo ehi:

“Perecatẽhira che porovasasa rese oipisise ava ndahei vahe judío iyavei peñemoirora ayapose mbahe aviye vahe acoi ava, ndayaracuai vahe upe” ehi.

²⁰ Ipare omombehu tupri ité Isaías osiquiyeẽhisave Tũpa ñehe aipo ehi vahe:

“Acoi ava ndache recai vahe, ahe che pisi ité yuvireco.

Iyavei ayemboyecua acoi ava che rese ndoporandui vahe upe” ehi.

²¹ Judío recocuer rese avei rumo aipo ehi: “Ari rupi añehe tēi ava che reroyasarēhi ndiporeroyai vahe upe vichico” ehi aracahe.

11

Movĩro tēi ava Israel pendar Tūpa oiporavo oyeupe nara

¹ Evocoiyase, ¿omombo pñha Tūpa ava Israel güembiporavo eta oyesui? ¡Aní eté! Esepia, che avei niha ichuindar aico. Abraham niha che ramoi eté, Benjamín suindar avei aico. ² Yip̃isuive ité niha Tūpa, “Co ava cheundar ité” ehi ore ramoi israelita upe. Sese cūritei ndore momboi eté oyesui. Peicua niha acoi Elías resendar icuachiapri aracahendar oyerogũi tēise omu israelita rese aipo ehise Tūpa upe: ³ “Che Yar, nde ñehe mombehusareta opa oyuca yuvireco. Ndeu porerecosa reropovēhesa renda avei opa omombo yuvireco. Che güeraño aicove vitemi nde reroyasar. Che yuca potaño avei eté rumo yuvireco” ehi. ⁴ Tūpa rumo omboyeṽi chupe: “Aipeha rumo siete mil tupri ava che mboyeroyasar cheyeupe nara noñenop̃ihai vahe Baal rahanga rovai yuvireco” ehi. ⁵ Ēgüe ehi avei cūritei op̃ita viteño movĩro judío, ahe niha Tūpa oiporavo oporoaisusa p̃ipe. ⁶ Ip̃ipe ité niha ěgüe ehi, ndahẽi eté que ava rembiapo sui oiporavo. Ava rembiapo suise rumo, ahese ndahe iri chira poroaisusa p̃ipe viña.

⁷ Evocoiyase judío eta ndosecai eté mbahe oipotá catu vahe Tũpa suindar yuvireco. Sembiporavo ete ité rumo oipisi yuvireco. Ambuae upe rumo Tũpa omboavai catu viroya āgua.

⁸ Icuachiapri pipe aipo ehi aracahe: “Tũpa nomboyecua uca iri mbahe secocuer pipe. Cũritei ěgüe ehiño vite ité yuvireco. Omondo tēi sesarā; ipipe rumo ndosepia ucai mbahe chupe. Omondo tēi avei yapisaguā; ipipe ndosenducua ucai mbahe chupe” ehi. ⁹ Iyavei David aipo ehi aracahe:

“Ipietasa ivonde nungar iyavei pira mbohasa nungar tasecoi chupe.

Ipipe sui toyuviroha mbahe tēi pipe yuvireco, toyemombaraisu uca avei ipipe yuvireco.

¹⁰ Toicua eme mbahe inungar ndasesapisoi vahe yuvireco.

Icuhapapri nungar ayase toyuvirecoi apirēhi vaheherā” ehi.

Ndahei vahe judío ñepisiro agüer

¹¹ Evocoiyase areco iri che porandusa pēu: ¿Apirēhi vaheherā ité pīha judío eta ndoyeroyai Jesucristo rese oñepisiro āgua yuvireco? ¡Aní eté! Ahe rumo ěgüe ehi ava ndahei vahe judío pĩsirosa pisi āgua yuvireco. Ipipe sui oyemonguerēhi catura judío ipisi āgua yuvireco curi. ¹² Evocoiyase judío eta rembiavi sui tuvichá Tũpa poroparaisuerecosa oime opacatu ava ndahei vahe judío upe. Coiye rumo tuvicha catu itera Tũpa poroparaisuerecosa opacatu ava upe oyevisē yuvireco chupe.

¹³ Che rumo areco che ñehesa pēu pe ndahei vahe judío. Tũpa niha che cuai oñehe mombehu āgua ndahei vahe judío upe. Sese, “Aviye ai eté

che poraviquisa” ahe che mu judío rovaque yepi. ¹⁴ Sendusa sui aviyeteramo oimera ipãhuve oye-monguerêhi vahe pĩsirosa Tũpa suindar pĩsi ãgua oyeupe nara yuvireco. ¹⁵ Esepia, judío mom-bosa pipe sui Tũpa omoime ñerosa opacatu ava co ivi pipendar upe. ¿Mara ehira pĩha evocoiyase Tũpa ipisise? Ahese oipisira tecovesa apirêhi vahe yuvireco, evocoiyase ndoyuvireco iri chira omano vahe nungar Tũpa upe. ¹⁶ Esepia, yipindar panguã sui yapopri seropovêhese Tũpa upe, opacatu panvi evocoiyase sovasapri avei ichui. Iyavei inungar ivira rapo seropovêhese Tũpa upe viña, sãca avei evocoiyase opacatu êgüe ehi aveira viña.

¹⁷ Amove che mu judío inungar Olivo rãca yasiapri. Pe evocoiyase ndahei vahe judío ivira caha pipendar rãca nungar peico vahe, peso yasiapri rendagüerve, ipipe sui peipisi vĩracuasa pe recove ãgua. ¹⁸ Aní chira rumo, “Yande aviye catu vahe yaico ivira rãca nungar yipindar yuvirecoi vahe sui” peye pe yeecomboivate aisa pipe. Esepia, ndahei pe sui judío oipisi oyemoviracua ãgua yuvireco, pe rumo yipindar ichui eté peipisi pe yemoviracua ãgua.

¹⁹ Iyavei, “Co judío rumo imombosa ité ivira rãca asiapri nungar yande sendagüerve yapita va-herã” peye revo. ²⁰ Supi eté, co rumo Tũpa reroyaêhi pipe ahe imombosa ichui yuvireco, pe rumo seroya pipe suiño ité pepita sendagüerve. Sese peicua catu, aní chira peyemboivate ai ipipe. ²¹ Esepia, Tũpa oiporavo co judío oyeupe nara ité viña, ndoviroyaise rumo, ndoipisii eté. Pëu avei êgüe ehira ndapemboyeroyaise.

²² Peyapısaca tupri, Tũpa niha aviye vahe ité. Seco pĩrata vahe avei rumo ava viroyaẽhisar upe. Pẽu rumo aviye ité. Peicoño catu iporoaisusa pipe; aviyeteramo ndapeicoise supi, pe avei yasiapri nungar tẽi peicora. ²³ Opoipase rumo judío eta Cristo reroyaẽhisa sui, Tũpa evocoyase viroyevi irira oyeupe nara. Esepia, chupe iya ité ipisi iri ãgua. ²⁴ Pe ndahei vahe judío ivira caha pipendar rãca yasiapri nungar peico, Tũpa rumo pe mondo ivira aviye vahe nungar rese. ¡Evocoyase judío ete ité inungar ahe ivira aviye vahe rãca yasiapri, ahe ivate catu oipisi irira oyeupe nara!

Ipa vahe judío ñepisiro agüer

²⁵ Che rivireta, che aipota, “Toicua Tũpa remimbotar icuapirẽhi oyemboivate aiẽhi ãgua yuvireco” ahe pẽu. Esepia, amove Tũpa judío upe omboavai viroya ãgua. Ahe rumo, “Tache reroyapa rane ité ndahei vahe judío che rese yuvirecoi pota vahe” ehi vite pẽu, ²⁶ ahese ramo opacatu ava judío yuvirecoi vahe Tũpa oipisirora. Esepia, icuachiapri aracahendar pipe aipo ehi:

“Oura ava Pĩsrosar judío recua Sión pãhu sui, ahe oipehara mbahe naporai vahe opacatu judío sui.

²⁷ Evocoi niha che remimbotar chupe nara, amocañise yangaipagüer yuvireco ichui” ehi.

²⁸ Êgüe ehi cũritei judío eta ndosendu potai ñehesa pĩsrosa resendar yuvireco. Sese Tũpa amotarẽhisar yuvirecoi. Pẽu mbahe tupri ãgua rumo êgüe ehi. Tũpa rumo osaisu vite. Esepia, yipive ité oiporavo tamoi eta oyeupe.

²⁹ Supi eté, Tũpa ndoviroyevi iri eté mbahe

güemimondo iyavei ndovirova-rova tēi vahe opihañemoñetasa güembiporavo sui. ³⁰ Yipindar niha pe ndapemboyeroyai eté Tūpa. Cūritei rumo judío eta ndoviroyaise yuvireco, pe paraisuereco Tūpa. ³¹ Ēgüe ehi avei judío eta cūritei ndoviroyai yuvireco. Tūpa pe paraisuereco uca āgua rumo Ēgüe ehi yuvireco. Coiye inungar pe, judío avei osupitira Tūpa poroparaisuerecosa yuvireco. ³² Esepia, Tūpa ité, “Opacatú oyavi mbahe che reroyaēhisa pipe” ehi ‘oicuase mbahe güembiavi, tiquerēhi opacatú che poroparaisuerecosa pisi āgua yuvireco’ oya.

³³ ¿Mara ehi rutei Tūpa aracuasa, imbahecuasa avei? Ndipoi chietera que ava yaracuasa mombehu tupri āgua. Ndayaicutui avei secocuer cuapa tupri āgua. ³⁴ Ndipoi eté que ava oicua vahe yande Yar pihañemoñetasa iyavei ndipoi eté que ambuae ava tēi ombohe vahe no. ³⁵ Ndipoi que ava mbahe omondo vahe yande Yar upe ‘tomboyevi cheu’ ohesave. ³⁶ Esepia, Tūpa suiño ité niha opacatu mbahe oime, oyeupe nara avei mbahe oyapo opiratasa pipe. ¡Sese imboeteipri ité Tūpa tasecoi yepi! Ēgüe tehi apirēhi.

12

Yande recocuer imondopri Tūpa upe nara

¹ Sese che rivireta, che Tūpa poroparaisuerecosa pipe aipota pe yemondo ité pe recovesese chupe nara, inungar mbahe Tūpa upe seropovēhepri ité, ahe aviye itera chupe. Ahe niha pe cuaita pe pihā pipe sui eté peyapo vaherā chupe. ² Peico iri emeco ivi pipendar pihañemoñetasa tēi rupi. Iyacatu

rumo pesecuñaro pe pihañemoñetasa. Ipipe sui opacatu pe recocuer oñecuñarora. Ëgüe peyese, peicuara Tũpa remimbotar ahe mbahe aviye vahe, semimbotar supi tupri vahe ité.

³ Tũpa niha oporovasasa pipe che cuai, sese aipo ahe pẽu: pepihañemoñeta eme pe yemboivate ai ãgua rese. Iyacatu rumo peicua tupri pe pihañemoñetasa peyesendar Tũpa pẽu mbahe imbougüer rupi sese pe yeroyasa pipe. ⁴ Inungar yande rete ñepeño ité, sesendar rumo setá, iyavei ndahoyoyai mbahe sembiapo. ⁵ Ëgüe yahe avei yande, yepe que yande retara viña, Cristo rese yayemboyase rumo, ñepe vahe nungar yaico. Evocoyase yande ñepepei opacatu upendar yaico.

⁶ Tũpa niha omboyeavirati mbahecuasa imbou oporoaisusa pipe ñepepei upe. Evocoyase Tũpa ombouse oñehe mombehu ãgua yandeu, yamombehura ñepepei iñehe sese yande yeroyagüer rupi. ⁷ Que ombouse mbahecuasa ambuae ava pĩtivii ãgua yandeu, yaipĩtivii tupri aveira. Ombouse yande porombohe ãgua, yaporombohe tupriño itera. ⁸ Iyavei ombouse yandeu ambuae ava monguerẽhi ãgua, yaporomonguerẽhiño itera. Ombouse yande poropĩtivii ãgua ava mbahe ndovirecoi vahe upe, yamondoño itera mbahe chupe yande recatẽhiẽhisave. Acoi oporocuai vahe, toyapoño oquerẽhisa pipe; iparaisu vahe pĩtiviisar, toipĩtiviiño avei vorivetesa pipe.

Cristo reroyasar cuaita

⁹ Iyavei peyeaisu tupri ité; aní pesepia potara mbahe tẽi, iyacatu rumo peicoño itera mbahe

aviye vahe pipe. ¹⁰ Peyeaisu catu ñepepei-pei oyeivri nungar tupri pe recosa pipe. Pe ae peyemboetei rãgüer sui pemboetei catura ambuae ava Jesús reroyasar.

¹¹ Peyemonguerẽhi, aní ndapequerẽhi chira iyavei peyapo yande Yar upe mbahe opacatu pe recoete pipe.

¹² Peicoño pe viharetasave mbahe iva pëndar rãrosa pipe; peñemosaño mbahe rasicuer peiporarse iyavei aní chira peseya pe yeruresa yepi.

¹³ Peipitivi ambuae ava Cristo reroyasar mbahe ipanese chupe, pemohapisira ava oyepota vahe pe piri.

¹⁴ Peyerure pe amotarẽhimbar rese; peporandu Tũpa porovasasa rese ahe ava upe nara; aní pe avei peñehe mara chupe.

¹⁵ Peyembovaha acoi ava oyembovaha vahe rupive; peyaseho avei ava oyaseho vahe rupive.

¹⁶ Peico tupri oyoya guasu ñepepei-pei oyese pe yeaisusa pipe. Aní chira peyecomboivate ai. Iyacatu rumo peyemoingatu ava seco mbegüemi vahe mbori ãgua. Aní peñemoha imbahecua vai vahe nungar.

¹⁷ Aní pẽu mbahe tẽi aposar upe pemboyevira mbahe tẽi avei. Peyapo catu mbahe tupri opacatu ava rembiepiave. ¹⁸ Peicatu vahe rupi peseca pe reco tupri ãgua opacatu ava upe. ¹⁹ Che rivireta, aní pe ae pemboyevi mbahe tẽi pipe pe rereco momarasar upe. Peseyaño Tũpa upe. Ahe oicuaru chupe. Esepia, icuachiapri pipe aipo ehi: “Che ité aicuaru ava mbahe tẽi aposar upe. Che amboepira” ehi yande Yar. ²⁰ Iyavei aipo ehi: “Acoi nde amotarẽhimbar ndasiepoise, emondo mbahe

itohu, iyavei acoi ihuseise, eremondora itoihu. Esepia, ãgüe peyese pe amotarẽhimbar upe, ochĩra pe sui” ehi. ²¹ Aní mbahe tẽi upe peyecopĩ uca. Iyacatu rumo pesecopĩra mbahe-mbahe tẽi mbahe tupri aposa pipe.

13

¹ Opacatu mborerecuar yuvirecoi vahe pemboyeroyara. Esepia, ndipoi mborerecuar ndovirecoi vahe ocuaita Tũpa suindar. Co oime vahe rumo semimbou ité. ² Sese acoi mborerecuar upe que mara ehi vahe, Tũpa porocuaita reroyaẽhisar yuvirecoi. ãgüe ehi vahe inupambri yuvirecoira. ³ Esepia, mborerecuar yuvirecoi vahe ndahei ava seco tupri vahe mbosiquiye ãgua yuvirecoi, ahe rumo yuvirecoi ava mbahe tẽi aposar mbosiquiye ãgua. Ndayasiquiye potaise mborerecuar sui, iya yaicora mbahe tupri pipe. Mborerecuar evocoyase, “Aviye” ehira yande reco catupriresa rese yandeu. ⁴ Esepia, ahe Tũpa rembiguai mbahe tupri apo ãgua yandeu. Acoi mbahe tẽi yayapose rumo, yasiqiyera ichui. Esepia, ahese mborerecuar yande nupaño itera yuvireco. Ahe niha Tũpa remimbotar rupi eté icuaita ava mbahe tẽi aposar nupa ãgua yuvireco. ⁵ Sese iya yamboyeroia ité mborerecuar; ndahei rumo ahe yande nupaẽhi ãgua reseño, yande pihañemoñetasa momaraẽhi ãgua rese avei. ⁶ Sese avei yamondora guarepochi mborerecuar upe yuvireco yandeu oporanduse. Esepia, ahe mborerecuar Tũpa rembiguai yuvirecoi. Evocoyase aheño ité iporaviquisa yuvireco.

⁷ Yamondo ñepeí-peí ava upe mbahe chupendar. Iya ité yamondo mborerecuar upe guarepochi oporanduse sese, yamboeteí aveí ava imboyeroy-aprí.

⁸ Aní yandereve. Ahe yande cuaita. Yande cuaita aveí yande yeaisu āgua, supí eté acói ava osaisu vahe ambuae ava, omboaviye ité Tūpa porocuaita. ⁹ Aipo ehi acói Tūpa porocuaita: “Ndapeyemboaguasai chira, ndapeporoyucaí chira, ndapemondai chira, ndaperemirai chira, ndapeipotá rai chiaveira ambuae ava mbahe” ehi. Co iyaveí opacatu ambuae Tūpa porocuaita sendusa tuprí ité co ambuae ñehesa rese: “Pesaisu ava pe yeaisu nungar” ehi. ¹⁰ Acoi vireco vahe oporoaisusa, ahe ndoyapoi eté mbahe ava upe; sese poroaisusa pípe imboaviyesa tuprí ité porocuaita.

¹¹ Iyaveí peicua tuprí co mbahe oime vahe yandeu. Cūriteí arí osupití ité yandeu yande yemopoase āgua. Esepia, yande Yar yeví āgua cōimi catu yandeu ñnehengagüer yípíndar seroyasa sui. ¹² Supí eté osupití senimi arí yandeu; sese iya-catu yapoi pītumimbi vahe nungar mbahe-mbahe tēi aposa sui mbahe icatuprí vahe pípe yande reco āgua. Evocoyase tayaico sundao oyoepisa omonde vahe nungar. ¹³ Yande catu yaguata yande reco ñvi tuprísa pípe, inungar yaguatase arí pípe. Aní catu yaico caguar pípe tēi iyaveí pieta siapu tēi vahe rupí, ndayande poropota rai chiaveira, iyaveí ndayayapoi chira mbahe tēi, ndayaicoi chiaveira yande píhañemoñeta ndahoyoyai vahe pípe, ambuae ava mbahe pota raisa pípe

avei no. ¹⁴ Iya rumo yarecora yande Yar Jesucristo recocuer yande yese, aní yande pihañemoñeta mbahe-mbahe tēi apo ãgua yande remimbotarai pipe.

14

Aní peroĩro ambuae Jesús reroyasar

¹ Acoi ava ndoyeroya tupri vitei vahe yande Yar rese que oiquese pe piri, peipisi tupriira; aní peiñehepoepira ipihañemoñetasa ndahoyoyaise pe pihañemoñeta rese. ² Esepia, amove evocoi nungar ava ihupri pãve tēi yuvirohu, oime rumo amove ava ipihañemoñeta opacatu mbahe hu ãgua rese. ³ Acoi ava opacatu mbahe ohu vahe, toviroĩro eme amove ndohui vahe mbahe iyavei acoi amove ndohui vahe mbahe, toviroĩro eme acoi ohu vahe opacatu mbahe. Esepia, evocoi nungar ava Tũpa oipisi ité. ⁴ Supi eté pe ndiyai eté peroĩro vaherã ambuae ava rembiguai. Esepia, ahe yande Yar povri pendar secoi. Yepe ndoyaviise mbahe ipipe, anise ichui oviapise mbahe tēi pipe, sereciar ité oicuaru chupe. Esepia, yande Yar opĩratasa pipe osecomoingatuño itera.

⁵ Oime avei amove ava ñepeí ari omboetei catu yuvireco ambuae ari sui, iyavei ambuae oime aipo ehi: “Oyoya guasuño ité niha ari” ehi vahe. Ñepeípei opihañemoñeta rupi, “Co supi tupri vahe” ehira opiha pipe yuvireco. ⁶ Acoi que ñepeí ari ava omboetei vahe, yande Yar mboeteisa pipe rumo ãgüe ehi. Iyavei ohu vahe opacatu mbahe, Yar mboeteisave avei ãgüe ehi. Esepia, ahe güembiapo rese, “Aviye ndeu” ehi Tũpa upe; iyavei acoi amove

ndohui vahe mbahe, Yar mboeteisave ãgüe ehi, iyavei, “Aviye ndeu” ehi avei Tũpa upe.

⁷ Esepia, yande ñepei-pei ndayaicoi yandeyeupe nara tẽi, ndayamanoi avei yandeyeupe nara.

⁸ Esepia, yaicove vıtese, yaico yande Yar upe nara; yamanose, yamano yande Yar upe nara avei. ãgüe yahe yande yaicove vıtese, anise yamanose, opacatu chupe nara ité yaico. ⁹ Sese niha Cristo omano, ipare ocuerayevı opacatu ava Yar güeco ãgua que omano vahe, anise que oicove vite vahe upe avei.

¹⁰ ¿Mahera evocoyase peroĩro pe mboetasa Cristo reroyasar iyavei mahera ndapesepia potai? Esepia, supi eté niha yande opacatú yasora Tũpa rovai. Ahe evocoyase opara oporandu yande recocuer rese yandeu. ¹¹ Esepia, icuachiaprı aracahendar pıpe omombehu:

“Supi eté che reco pıpe aipo ahe, ehi yande Yar, opacatu ava oñenopıhara che rovai yuvıreco, iyavei che mboeteira yuvıreco, ehi” ehi.

¹² Evocoyase yande ñepei-pei yamombehura yande recocuer Tũpa upe.

Anı pe rivıreta mbahe tẽi pıpe pereco uca

¹³ Sese yande ndiyai yañeroĩro. Iyacatu rumo ñepei reseve pereco tuprı ambuae pe rivrı, angaipa pıpe sereco ucaẽhi ãgua, iyeroyasa momaraẽhi ãgua avei. ¹⁴ Che yande Yar reroyasar che reco pıpe aicua ndipoi eté que tembihu yande reco momara vahe. Amove rumo ava, “Mbahe tẽi co tembihu, ndiyai yahu” ehise, ahe chupe evocoyase mbahe tẽi, ndiyai eté ihu ãgua. ¹⁵ Iyavei

yande que mbahe yahuse, ipipe yamomara tēise yande rivrī pīhañemoñetasa Tūpa rese, ndahei evocoyase yande poroaisusa pīpe ité ěgüe yahe. ¡Aní ahe yamocañi tēi uca Cristo sui evocoi nungar mbahe yahu vahesa pīpe! Esepia, secocuer rese Cristo omano. ¹⁶ Yepe que mbahe aviye yan-deu viña, ndayayapoi chira rumo evocoi nungar yande rembiapo rese ava ñehe-ñehe tēiēhi āgua. ¹⁷ Esepia, ndahei ivate catu vahe Tūpa upe yande carusa, yande igua avei ipovrive yande recose. Ěgüe ehi rumo co ivate catu vahe chupe yande recocuer mohivisa, yande reco tuprisa ambuae Tūpa reroyasar pāhuve iyavei yande rorivetesa yareco vahe Espiritu Santo sui. ¹⁸ Ěgüe yahese Cristo mboeteisave, aviye aira Tūpa upe iyavei opacatu ava rembiepiave avei no.

¹⁹ Sese opacatu yande recoeté pīpe yasecara yaico tupri vaherā yandeyeupe. Ipipe sui yande yaicatura yañepitivii yande yemoviracua tupri āgua yande Yar rese. ²⁰ Aní pemocañi uca tēi ava recocuer Tūpa remipisiro tembihu sui tēi. Opacatu niha co tembihu aviye aiño ité; ndiyai eté rumo yahu que tembihu ambuae ava Cristo reroyasar pīhañemoñetasa momara āgua. ²¹ Aviye catu ndayahuisse mbahe roho, que ndayahuisse uva ricuer iyavei que ambuae mbahe ndayayapoise, ambuae ava Cristo reroyasar angaipa pīpe seiti uca iriēhi āgua. ²² Yande pīhañemoñetasa yareco vahe rumo yarecoño itera yandeyeupe ité Tūpa rovaque. ¡Aviye ai catuño ité ava acoi, “Aviye yaya-pose evocoi nungar mbahe” he pare, “¿Mara ehi pīha?” ndehi irise opīhañemoñetasa pīpe! ²³ Acoi

que ava, “¿Mara ehi pīha?” ehise tembihu upe. Ipare rumo ohuse, ahe evocoyase oyemboangaipa ipipe. Esepia, ndohui Tūpa rese oyeroyasa pipe. Iyavei ava, “¿Mara ehi pīha?” ehi vītese que mbahe upe, ipare oyapose ité, ahe angaipa.

15

Yambovihara ava yande cotindar, ndahei chira yande ae tēi yayembovihara

¹ Yande yayemoviracua catu vahe Cristo rese yande yeroyasa pipe, iyacatu yande teieté yañemosañora ava Tūpa rese ndipihañemoñeta tupri vītei vahe rese. Ndahei chira rumo yande ae tēi yayemboviha. ² Iyacatu rumo opacatu yande yambovihara ava yande cotindar, yayapo aveira mbahe aviye vahe seco aviye āgua yuvireco chupe ‘toyeroya catu opihañemoñeta pipe Tūpa rese yuvireco’ yande yapave. ³ Esepia, Cristo ndahei ahe ae oyemohapisi, ahe rumo oyapo mbahe, icuachiapri mombehusa rupi tupri ité acoi omombehu vahe: “Nde rese ñeheñehe tēi opa aipisi” ehi. ⁴ Supi eté co opacatu omombehu vahe aracahe opa icuachiasa yande mbohe āgua, yande yasāro vaherā Tūpa reco porañetesa yande ñemosasa pipe iyavei yande pīhamonguerēhisa pipe avei ahe yareco vahe ichuindar. ⁵ Tūpa, acoi ombou vahe yande ñemosasa, yande pīhamonguerēhisa avei yandeu, tape pītivii oyoya guasu pe reco tupri āgua ñepeipei peyese Jesucristo recocuer rupi. ⁶ Ipipe sui pe opacatu oyoya guasu ñepeipei pīhanemoñetasa

pipe, pe ñehe pipe avei tapemboetei Tũpa, yande Yar Jesucristo Ru.

Ñehesa pĩsĩrosa resendar imombehusa ava eta ndahei vahe judío upe

⁷ Peyepĩsi tupri ñepei-pei, inungar Cristo pe pĩsi tupri oyeupe nara Vu mboetei ãgua. ⁸ Che rumo aipo ahe pẽu: Jesucristo ou judío pĩtivĩi Tũpa remimombehugũer mboaviye ãgua judío ramoĩ aracaendar upe. Êgũe ehi Tũpa oñehe mboaviyesa mboyecua ⁹ ‘tomboetei ava ndahei vahe judío yuvĩrecoi vahe che Ru Tũpa iporoparisuerecosa rese yuvĩreco’ oyapave. Ahe êgũe ehi icuachiapri rupi tupri ité aipo ehi vahe:

“Sese che oromboeteira opacatu ava ndahei vahe judío pãhu rupi, iyavei asapucaira ndeu nde rer mboeteisa pipe” ehi.

¹⁰ Iyavei acoi ambuae icuachiapri pipe omombehu avei no:

“¡Peyemboviha catu pe opacatu ndahei vahe judío peico vahe judío Tũpa rembiporavo reseve!” ehi.

¹¹ Ambuae pipe avei aipo ehi no:

“Pe opacatu ivi pipendar ava, ipemboetei yande Yar!” ehi.

¹² Isaías avei aipo ehi icuachía:

“Oimera niha ava Isaí suindar, opacatu ava rerecuarã secoira.

Ava ndahei vahe judío seseño ité oyeroyara yuvĩreco” ehi.

¹³ Tũpa acoi ombou vahe mbahe oyesuindar rãro ãgua, tayande mboviharete catu iyavei mbahe tupri tayareco sese yeroyasa pipe. Ipipe sui

tombou yasãro vaherã ahe mbahe aviye vahe Espíritu Santo pĩratasa pipe.

¹⁴ Che rĩvireta, ayeroya ité pe reco aviyesa rese, opacatu mbahe peicuapa tupri, peicatu avei pe ñepei-pei peyeupe pe yemboaracua ãgua.

¹⁵ Co tecocuer rese rumo aicuachía opacatu che siquiyeẽhisa pipe pẽu pe resaraiẽhi ãgua ichui. Esepia, ayapo Tũpa che cuaita ombou vahe che raisusa pipe cheu ¹⁶ Jesucristo rese che poraviqui ãgua ava ndahei vahe judío recocuer aviye ãgua. Evocoyase judío pahi nungar che cuaisa pipe amombehu co ñehesa Tũpa ombou vahe pĩsirosa resendar yuvireco chupe imoporẽhi ãgua Tũpa rovai inungar mbahe seropovẽhepri aviye vahe Tũpa upe Espíritu Santo pipe yepi.

¹⁷ Supi eté che Jesucristo reroyasar che recosa pipe aviharete Tũpa che cuaita rese. ¹⁸ Esepia, cheu ndiyai añehe vaherã que ambuae mbahe rese: co mbahe Cristo oyapo uca vahe cheu ava ndahei vahe judío recocuer rese, seseño ité iyacatu cheu añehe vaherã. Esepia, amonguerẽhi Tũpa reroya ãgua yuvireco che ñehe rese, che rembiapo sui avei. ¹⁹ Ëgüe ahe poromondiisa mbahe yavai vahe apo Tũpa pĩratasa pipe. Ahe ayapo Espíritu Tũpa suindar pĩratasa pipe. Ipípe che amboaviye ñehesa Cristo resendar mombehu vichico. Tecua Jerusalén sui tupri aguata opacatu rupi, ayepota ivi Iliria ve avei no. ²⁰ Chequerẽhi avei co ñehesa pĩsirosa resendar mombehu ãgua ava Cristo recocuer ndosendui vahe upe yepi. Ndahei rumo ambuae ava imboaracua pare tẽi, ²¹ che rumo ayapo inungar icuachiapri pipe omombehu vahe:

“Ava ndoicuai vahe ité, ahe osepiara yuvireco curi, acoi ndosendui vahecuer, osenducua tupri aveira secocuer yuvireco no” ehi.

Pablo ipihañemoñeta Roma ve oso ãgua

²² Co rese tēi che ndaicutui aso pe piri, yepe setá rupi aso pota tēi viña. ²³ Cūritei rumo opa amboaviye che poraviqui co ivi rupi, iyavei opa tēi setá araviter pe piri che sosa rãgüer. ²⁴ España ve che soseve, apita pucumira vicho pe piri yande yemboviha ãgua. Iyavei pe sui che sē potase, che p̃tivismira peye aheve che so ãgua. ²⁵ Cūritei rumo che asora Jerusalén ve. Arasora porerecosa ahe pendar yande mboetasa Jesús reroyasar p̃tivismira ãgua. ²⁶ Esepia, ivi Macedonia pendar iyavei Acaya pendar Jesús reroyasar, ahe omonuha guarepochi yuvireco Jerusalén ve yande rivri iparaisu vahe p̃tivismira ãgua yuvireco. ²⁷ Ahe ãgüe ehi güemimbotar rupi yuvireco iyavei iya ité imboyevi ãgua yuvireco chupe ahe mbahe tupri oyeupe apo agüer rese. Esepia, yipendar Jesús reroyasar judío yuvirecoi vahe oicua uca co tecocuer Tūpa suindar ahe ava ndahei vahe judío yuvirecoi vahe upe. Sese iya ité imboyevi ãgua co ivi pendar porerecosa chupe. ²⁸ Opase che co porerecosa amondo yuvireco chupe, España ve che sose, ahese apitara vicho pe piri. ²⁹ Che amoha voi eté asose eipeve, tuvichá omboura Cristo oporovasasa yandeu.

³⁰ Che rivireta, yande Yar Jesucristo rer pipe iyavei yeaisusa Espiritu ombou vahe pipe avei aporandu p̃eu opacatu che rese peyeroqui p̃rata vahe rã Tūpa upe che p̃tivismira ãgua co mboraviqui

rese. ³¹ Peporandu Tũpa upe, tache repi ava Jesús reroyasarẽhi sui ivi Judea ve, iyavei Jerusalén pendar yande rivireta co porerecosa pisi tupri água avei. ³² Ahese Tũpa oipotase, che aviharetera ayepotase pe repia, iyavei toime pituhusa yandeu che pe piri che sose. ³³ Ëgüe tehi Tũpa güeco tuprisa pipe tasecoi opacatu pe rese.

16

Pablo mahenduhasa ñepeí-peí ava upe

¹ Co yande reindri Febe serer vahe, ahe oipitivi tecua Cencrea pendar Cristo reroyasar oico.

² Peipisi tupri catu yande Yar rer pipe; ahe niha yande cuaita Cristo reroyasar yande recose, iyavei peipitiviño que mbahe chupe ipane vahe rese. Esepia, ahe setá ité oporopitivi iyavei che avei eté che pitivi no.

³ Pemombehu che mahenduha Prisca upe, Aquila upe avei, ahe niha che pitivi mboraviqui Jesucristo recocuer resendar rese yuvireco. ⁴ Ahe avei niha mbahe tẽi pipe omondo güecocuer che repicave yuvireco, sese, “Aviye” ahe chupe, iyavei ndahei che güeraño aipo ahe, opacatu yande rivri ndahei vahe judío aipo ehi avei yuvireco chupe. ⁵ Pemombehu avei che mahenduha sêtave oñemonuha vahe upe yuvireco. Pemombehu avei che mahenduha che rembiaisu Epeneto upe. Ahe rane niha yipindar ivi Asia pendar Cristo reroyasar. ⁶ Pemombehu avei che mahenduha María upe. Ahe niha oporaviqui iteanga vahe pe recocuer rese. ⁷ Pemombehu avei che mahenduha che mu Andrónico iyavei Junias

upe. Ahe niha che mboetasa yuvirecoi che roquendasave; ahe avei apóstol remimboyeroya yuvirecoi, ahe rane avei yipindar Cristo reroyasar yuvirecoi che sui.

⁸ Pemombehu avei che mahenduha che rembiaisu Ampliato upe yande Yar rese secosa pipe.

⁹ Pemombehu avei che mahenduha Urbano upe. Ahe niha yande ndugüer oporaviqui vahe Cristo recocuer rese, che mboripar Estaquis upe avei.

¹⁰ Pemombehu avei che mahenduha Apeles upe.

Ahe niha güecoãhasa sui osē tupri vahe Cristo rese oyeroyasa pipe. Iyavei pemombehu che mahenduhasa ava Aristóbulo rēta pipendar yuvirecoi vahe upe avei.

¹¹ Pemombehu avei che mahenduha che mu Herodión upe, ava Narciso rēta pipendar yande Yar reroyasar upe avei.

¹² Pemombehu avei che mahenduha Trifena upe iyavei Trifosa upe.

Ahe niha oporaviqui vahe yande Yar upe nara yuvireco, iyavei yande rembiaisu yande reindri Pérsida. Ahe avei niha oporaviqui ité yande Yar upe nara.

¹³ Pemombehu avei che mahenduha Rufo upe, ahe niha icuapri ité Jesús reroyasar seco rese. Iyavei ichi, ahe che si nungar ité secoi.

¹⁴ Pemombehu avei che mahenduha Asíncrito upe, Flegonte upe, Hermes upe, Patrobas upe, Hermas upe iyavei opacatu ambuae yande rivireta supi yuvirecoi vahe upe avei.

¹⁵ Pemombehu avei che mahenduha Filólogo upe iyavei Julia upe, Nereo upe iyavei seindri upe, Olimpás upe, opacatu yande rivri yande Yar rese yuvirecoi vahe ipirindar upe avei.

¹⁶ Peyeovaupite catu pe reco maranehisa pipe che mahenduha mombehuse peyeupe. Opacatu

Cristo reroyasar cohave omondo avei omahenduhasa yuvireco p̃eu.

17 Che rivireta, peicua catu pe p̃ahu pendar omboyaho pota serai vahe sui. Oime ava ěgüe ehi vahe, oiti uca vahe ava mbahe t̃ei pipe. Esepia, ahe ndahei eté co ñehesa pe yembohesa rupi yuvirecoi. Sese evocoi nungar ava sui peyepipiño itera. 18 Esepia, ahe ava ndahei yande Yar Jesucristo upe nara oyapo mbahe yuvireco. Ěgüe ehi rumo ahe oyeupe nara t̃ei oipota rai mbahe yuvireco. Iyavei ombopa ava ndayaracua tuprii vahe; oñehe tupri ai angahu oporomohapisi aisa pipe t̃ei yuvireco. 19 Opacatu ité icuasa pe poreroyasa. Sese che aviharete vichico. Che rumo aipota pemboyecua vaherã pe mbahecuasa mbahe aviye vahe apo ãgua, ndahei mbahe t̃ei apo ãgua. 20 Evocoyase Tũpa güeco tuprisa pipe pihaivi Carugar osecopipa tupri itera. Pe avei evocoyase pesecoreroyira. Yande Yar Jesucristo tape rovasa.

21 Omondo avei omahenduhasa Timoteo p̃eu. Ahe che p̃itivii che poraviquisa rese yepi. Iyavei che mu Lucio, Jasón, Sosípater, ahe avei imahenduha yuvireco pe rese.

22 Che, Tercio, aikuachía vahe co ñehesa p̃eu, che avei che mahenduhasa amondo yande Yar reroyasa pipe p̃eu.

23 Omondo avei omahenduhasa Gayo p̃eu. Ahe s̃etave ité niha aque yepi, ipiri avei ambuae Jesús reroyasar oñemonuha yuvireco yepi. Iyavei Erasto omondo omahenduhasa opacatu p̃eu, ahe

tecua mbahe guarepochi apocatusar. Yande rívrí Cuarto avei omondo omahenduhasa pëu.

²⁴ Aviye, yande Yar Jesucristo tape rovasa opacatu.

Pablo omboetei Tũpa

²⁵ ¡Yamboetei Tũpa! Ahe niha oicatu pe moviracua co ñehesa ñepisirosa resendar amombehu vahe rupi iyavei co porombohesa Jesucristo recocuer resendar rupi avei. Ahe oyoya tupri ité Tũpa omboyecua ramo vahe cheu co ivi apoëhi suive mbahe ndicuasai vahe rese.

²⁶ Cũritei rumo oyecua uca oñehe mombehusar rembicuachía pipe Tũpa apirëhi vahe porocuita rupi cute. Ahe ñehesa ndicuasai vahe omboyecua uca opacatú ava upe ‘toviroya sese oyeroyasa pipe yuvireco’ oya.

²⁷ ¡Tũpa güeraño imbahecuá vahe yepi, ëgüe tehi ahe yande Yar Jesucristo rer pipe imboeteipri tasecoi!

Tũpa Ñehengagüer
New Testament in Guarayu (BL:gyr:Guarayu)

copyright © 2011 Wycliffe Bible Translators, Inc.

Language: Guarayu

Translation by: Wycliffe Bible Translators, Inc.

Guarayu [gyr], Bolivia

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guarayu

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source files
dated 29 Jan 2022

c27c2d97-c359-59f5-b367-83efb2e33739